

漢  
魏  
叢  
書

三  
三



王子年拾遺記卷第五

晉 隴西王嘉

梁 蘭陵蕭綺錄

明 新安程榮校

前漢上

漢太上皇微時佩一刀長三尺上有銘其字難識疑是殷高宗伐鬼方之時所作也上皇遊酆沛山中寓居窮谷裏有人歐冶鑄上皇息其傍問曰此鑄何器工者笑而荅曰爲天子鑄劍慎勿泄言上皇謂爲戲

言而無疑色工人曰今所鑄鐵鋼礪難成若得公腰  
間佩刀雜而冶之卽成神器可以剋定天下星精爲  
輔佐以殲三猾木衰火盛此爲異兆也上皇曰余此  
物名爲匕首其利難儔水斷虬龍陸斬虎兕魑魅罔  
兩莫能逢之斫玉鐫金其刃不卷工人曰若不得此  
匕首以和鑄雖歐冶專精越砥斂鐔終爲鄙器上皇  
則解匕首投於鑪中俄而烟焰衝天日爲之晝晦及  
乎劔成殺三牲以釁祭之鑄工問上皇何時得此匕  
首上皇云秦昭襄王時余行逢一野人於陌上授余

云是殷時靈物世世相傳上有古字記其年月及成  
劍工人視之其銘尚存叶前疑也工人卽持劍授上  
皇上皇以賜高祖高祖長佩於身以殲三猾及天下  
已定呂后藏於寶庫庫中守藏者見白氣如雲出於  
戶外狀如龍蛇呂后改庫名曰靈金藏及諸呂擅權  
白氣亦滅及惠帝卽位以此庫貯禁兵器名曰靈金  
內府也

錄曰夫精靈變化其途非一冥會之感理故難常  
至如墳讖所載咸取驗於已往謠歌里說皆求徵



於未來考圖披籍徃徃而編列矣觀乎工人之說  
諒妖言之遠効焉三尺之劔以應天地之數故三  
爲陽數亦應天地之德按鉤命決曰蕭何爲昴星  
精項羽陳勝胡亥爲三猾國爲木德漢叶火位此  
其徵也

孝惠帝二年四方咸稱車書同文軌天下太平干戈  
偃息遠國殊鄉重譯來貢時有道士姓韓名稚則韓  
終之胤也越海而來云是東海神使聞聖德洽乎區  
宇故悅服而來庭時有東極出扶桑之外有泥離之

國來朝其人長四尺兩角如璽牙出於唇自乳已來  
有靈毛自蔽居於深穴其壽不可測也帝云方士韓  
稚解絕國人言令問人壽幾何經見幾代之事荅曰  
五運相承迭生迭死如飛塵細雨存歿不可論筭問  
女媧以前可聞乎對曰虵身已上八風均四時序不  
以威悅攬乎精運又問燧人以前荅曰自鑽火變腥  
以來父老而慈子壽而孝自軒皇以來屑屑焉以相  
誅滅浮靡囂動淫於禮亂於樂世德澆訛淳風墜矣  
稚以荅聞於帝帝曰悠哉杳昧非通神達理者難可

語乎斯遠矣稚於斯而退莫知其所之帝使諸方士  
立仙壇於長安城北名曰祠韓館俗云司寒之神祀  
於城陰按春秋傳曰以享司寒其音相亂也定是祠  
韓館至二年詔宮女百人文錦萬疋樓船十艘以送  
泥離之使大赦天下

漢武帝思懷往者李夫人不可復得時始穿昆靈之  
池泛翔禽之舟帝自造歌曲使女伶歌之時日已西  
傾涼風激水女伶歌聲甚道因賦落葉哀蟬之曲曰  
羅袂兮無聲玉墀兮塵生虛房冷而寂寞若葉依於

重扁望彼美之女兮安得感余心之未寧帝聞唱動  
心悶悶不自支持命龍膏之燈以照舟內悲不自止  
親侍者覺帝容色愁怨乃進洪梁之酒酌以文螺之  
卮卮出波祇之國酒出洪梁之縣此屬右扶風至哀  
帝廢此邑南人受此釀法今言雲陽出美酒兩聲相  
亂矣帝飲三爵色悅心歡乃詔女伶出侍帝息於延  
涼室卧夢李夫人授帝薜蘿之香帝驚起而香氣猶  
著衣枕歷月不歇帝彌思求終不復見涕泣洽席遂  
改延涼室爲遺芳夢室初帝深嬖李夫人死後常思

夢之或欲見夫人帝貌顛頰嬪御不寧詔李少君與之語曰朕思李夫人其可得乎少君曰可遙見不可同於帷幄暗海有潛英之石其色青輕如毛羽寒盛則石溫暑盛則石冷刻之爲人像神悟不異真人使此石像往則夫人至矣此石人能傳譯人言語有聲無氣故知神異也帝曰此石像可得否少君曰願得樓船巨力千人能浮水登木皆使明於道術齋不死之藥乃至暗海經十年而還昔之去人或升雲不歸或託形假死獲反者四五人得此石卽命工人依先

圖刻作夫人形刻成置於輕紗幙裏宛若生時帝大  
悅問少君曰可得近乎少君曰譬如中宵忽夢而晝  
可得近觀乎此石毒宜遠望不可逼也勿輕萬乘之  
尊惑此精魅之物帝乃從其諫見夫人畢少君乃使  
舂此石人爲丸服之不復思夢乃築靈臺臺歲時祀  
之

元封元年浮忻國貢蘭金之泥此金出湯泉盛夏之  
時水常沸湧有若湯火飛鳥不能過國人常見水邊  
有人冶此金爲噐金狀混混若泥如紫磨之色百鑄

其色變白有光如銀卽銀燭是也常以此泥封諸函匣及諸宮門鬼魅不敢干當漢世上將出征及使絕國多以此泥爲璽封衛青張騫蘇武傅介子之使皆受金泥之璽封也武帝崩後此泥乃絕焉

日南之南有淫泉之浦言其水浸淫從地而出成淵故曰淫泉或言此水甘軟男女飲之則淫其水小處可濫觴褰涉大處可方舟沿沂隨流屈直其水激石之聲似人之歌笑聞者令人淫動故俗謂之淫泉時有鳧鴈色如金羣飛戲於沙瀨羅者得之乃真金鳧

也昔秦破驪山之墳行野者見金鳧向南而飛至滎  
泉後寶鼎元年張善爲日南太守郡民有得金鳧以  
獻張善該博多通考其年月即秦始皇墓之金鳧也  
昔始皇爲塚斂天下瓌異生殉工人傾遠方奇寶於  
塚中爲江海川瀆及列山岳之形以沙棠沉檀爲舟  
楫金銀爲鳧鴈以瑠璃雜寶爲龜魚又於海中作玉  
象鯨魚銜火珠爲星以代膏燭光出墓中精靈之偉  
也昔生埋工人於塚內至被開時皆不死工人於塚  
內琢石爲龍鳳仙人之像及作碑文辭讚漢初發此



塚驗諸史傳皆無列仙龍鳳之製則知生理匠人之所作也後人更寫此碑文而辭多怨酷之言乃謂爲怨碑史記略而不錄

董偃常卧延清之室以畫石爲床文如錦也石體甚輕出鄧支國上設紫瑠璃帳火齊屏風列靈麻之燭以紫玉爲盤如屈龍皆用雜寶飾之侍者於戶外扇偃偃曰玉石豈須扇而後涼耶侍者乃卻扇以手摸方知有屏風又以玉精爲盤貯冰於膝前玉精與水同其潔澈侍者謂冰之無盤必融濕席乃合玉盤拂

之落堦下冰玉俱碎偃以爲樂此玉精千塗國所貢也武帝以此賜偃哀平之世民家猶有此器而多殘破及王莽之世不復知其所在

太初二年大月氏國貢雙頭雞四足一尾鳴則俱鳴武帝置於甘泉故館更以餘雞混之得其種類而不能鳴諫者曰詩云牝雞無晨一云牝雞之晨惟家之索今雄類不鳴非吉祥也帝乃送還西域行至西關雞反顧望漢宮而哀鳴故謠言曰三七末世雞不鳴犬不吠宮中荆棘亂相係當有九虎爭爲帝至王莽

木遺記 卷五 七  
墓位將軍有九虎之號其後喪亂彌多宮掖中生蒿  
棘家無雞鳴犬吠此雞未至月支國乃飛于天漢聲  
似鷓鴣雞翱翔雲裏一名暄雞昆暄之音相類

天漢二年渠搜國之西有祈淪之國其俗淳和人壽  
三百歲有壽木之林一樹千尋日月爲之隱蔽若經  
憇此木下皆不死不病或有泛海越山來會其國歸  
懷其葉者則終身不老其國人綴草毛爲繩結網爲  
衣似今之羅紈也至元狩六年渠搜國獻網衣一襲  
帝焚於九達之道恐後人徵求以物奢費燒之烟如

金石之氣

太始二年西方有因霄之國人皆善嘯丈夫嘯聞百里婦人嘯聞五十里如笙竽之音秋冬則聲清亮春夏則聲沉下人舌尖處倒向喉內亦曰兩舌重沓以爪徐刮之則嘯聲逾遠故呂氏春秋云反舌殊鄉之國卽此謂也有至聖之君則來服其化

錄曰漢興維六國之遺弊天下思於聖德是以黔黎嗟秦亡之晚恨漢來之遲高祖肇基帝業恢張區宇孝惠務寬刑辟以成無爲之治德侔三王教

通四海至于武帝世載愈光省方巡岳標元崇號  
聞禮樂以恢風廣文義以飾俗改律曆而建封禪  
祀百神以招羣瑞雖欽明茂於唐書文思稱於虞  
典豈尚茲焉觀乎周孔之教不貴虛無之學武帝  
脩黃老治卻老之方求報無福之祀是以張敞切  
言使遠斥仙術指以萇弘楚襄懷秦皇徐福之事  
故新垣之徒卒見夷戮夫仙者尚冲靜以忘形體  
守寂寞而祛囂務武帝好微行而尚剋伐恢宮宇  
而廣苑囿未乖長生久視之法失玄一守道之要

悔少翁之先誅惑藥大之詭說至如李夫人緬心  
昵愛專媚蘭閨思沉魂之更生飭新宮以延佇蓋  
猶嬖惑之寵過熾累心之結未祛欲竦身雲霓之  
表與天地而齊畢由係風晷其可階乎雖未及玄  
真頗參神窳是以幽明不能藏其殊妙萬象無所  
隱其精靈考諸仙部驗以衆說未有異於斯乎夫  
五運遞興數之常理金土之兆魏晉當焉董偃起  
自販珠之徒因庖宰而升寵竊幸一時富傾海宇  
內蓄神異之珍銜非世之寶一朝絕愛信盛衰之

有兆乎夫爲棺槨者以防螻蟻之患爲斂骨之具  
聖人使合其正禮惡其踰費疾其過薄至如澹臺  
滅明之儉盛姬秦皇之奢皆失於節用嗟乎形銷  
神滅歟爲一棺之土爲陵成谷瓊珣美寶奄爲燼  
塵斯則費生加死無益身名也冥然長往何憶曩  
時之盛仲尼云不如速朽斂手足形聖人以斯昭  
誠豈不尙哉

王子年拾遺記卷第五

王子年拾遺記卷第六

晉隴西王嘉著

梁蘭陵蕭綺錄

明新安程榮校

前漢下

昭帝元始元年穿淋池廣千步中植分枝荷一莖四  
葉狀如駢蓋日照則葉低蔭根莖若葵之衛足名曰  
低光荷實如玄珠可以飾佩花葉葳蕤芬馥之氣徹  
十餘里食之令人口氣常香益脉理病宮人貴之每



遊宴出入必皆含嚼或剪以爲衣或折以蔽日以爲  
戲弄楚辭所謂折芰荷以爲衣意在斯也亦有倒生  
菱莖如亂絲一花千葉根浮水上實沉沉中名紫菱  
食之不老帝時命水嬉遊宴永日土人進一豆槽帝  
曰桂楫松舟其猶重朴况乎此槽可得而乘也乃命  
以文梓爲船木蘭爲拖刻飛鸞翔鷁飾於船首隨風  
輕漾畢景忘歸乃至通夜使宮人歌曰秋素景兮泛  
洪波揮纖手兮折芰荷涼風淒淒揚棹歌雲光開曙  
月低何萬歲爲樂豈云多帝乃大悅起商臺於池上

及乎末歲進諫者多遂省薄遊幸堙毀池臺鸞舟荷  
芰隨時廢滅今臺無遺址溝池已平

宣帝地節元年樂浪之東有背明之國來貢其方物  
言其鄉在扶桑之東見日出於西方其國昏昏常暗  
宜種百穀名曰融澤方三千里五穀皆良食之後天  
而死有浹日之稻種之十旬而熟有翻形稻言食者  
死而更生天而有壽有明清稻食者延年也清腸稻  
食一粒歷年不饑有搖枝粟其枝長而弱無風常搖  
食之益髓有鳳冠粟似鳳鳥之冠食者多力有遊龍

粟葉屈曲似遊龍也有瓊膏粟白如銀食此二粟令人骨輕有繞明豆其莖弱自相縈纏有挾劍豆其莢形似人挾劍橫斜而生有傾離豆言其豆見日葉垂覆地食者不老不疾有延精麥延壽益氣有昆和麥調暢六府有輕心麥食者體輕有醇和麥爲麴以釀酒一醉累月食之凌冬可袒有含露麥穗中有露味甘如飴有紫沉麻其實不浮有雲冰麻實冷而有光宜爲油澤有通明麻食者夜行不持燭是苜蓿也食之延壽後天而老其北有草名虹草枝長一丈葉如

車輪根大如轂花似朝虹之色昔齊桓公伐山戎國  
人獻其種乃植於庭云霸者之瑞也有宵明草夜視  
如列燭晝則無光自消滅也有紫菊謂之日精一莖  
一蔓延及數畝味甘食者至死不饑渴有焦茅高五  
丈燃之成灰以水灌之復成茅也謂之靈茅有黃渠  
草映日如火其堅韌若金食者焚身不熱有夢草葉  
如蒲莖如著採之以占吉凶萬不遺一又有聞遐草  
服者耳聰香如桂莖如蘭其國獻之多不生實葉多  
菱黃詔並除焉元鳳二年於淋池之南起桂臺以望

遠氣東引太液之水有一連理桂樹上枝跨於渠水下枝隔岸而南生與上枝同一株帝常以季秋之月泛蘅蘭雲鷁之舟窮晷係夜釣於臺下以香金爲鈎繡絲爲綸丹鯉爲餌釣得白蛟長三丈若大蛇無鱗甲帝曰非祥也命太官爲鮓肉紫骨青味甚香美班賜羣臣帝思其美漁者不能復得知爲神異之物

二年含塗國貢其珍怪其使云去王都七萬里鳥獸皆能言語鷄犬死者埋之不朽經歷數世其家人遊於山阿海濱地中聞鷄犬鳴吠主乃握取還家養之

毛羽雖禿落更生久乃悅澤

張掖郡有郅族之盛因以名也郅竒字君珍居喪盡禮所居去墓百里每夜行常有飛鳥銜火夾之登山濟水號泣不息未嘗以險難爲憂雖夜如晝之明也以淚灑石則成痕著朽木枯草必皆重茂以淚浸地卽醜俗謂之醜鄉至昭帝嘉其孝與表銘其邑曰孝感鄉四時祭祀立廟焉

錄曰夫心迹所至無幽不徹理著於微冥昧自顯玄曦迴魯陽之戈嚴霜感匹夫之歎在於凡倫尚

昭神迹况求之精爽以會蒸蒸之心木石爲之玄  
感鳥獸爲之馴集元偉哀號春花以之改葉叔通  
晨興朝流歆生橫石辛繕表跡於棲鸞衛農示德  
於夢虎郅氏之行類斯道焉按漢昭帝時有黃鵠  
下太液池今云淋池蓋一水二名也宣帝之世有  
嘉穀玄稷之祥亦不說今之所生豈由神農后稷  
播厥之功抑亦王子所稱非近俗所食詮其名華  
而不實及乎飛夫之類神木怪草見奇而說萬世  
之瑰偉也

漢成帝好微行於太液池傍起宵遊宮以漆爲柱鋪  
黑綈之幕噐服乘輿皆上黑色旣悅於暗行憎燈燭  
之照宮中美御皆服皂衣自班婕妤已下咸帶玄綬  
簪珮雖如錦綉更以木蘭紗綃罩之至宵遊宮乃秉  
燭宴幸旣罷靜鼓自舞而步不揚塵好夕出遊造飛  
行殿方一丈如今之輦選羽林之士負之以趨帝於  
輦上覺其行快疾聞其中若風雷之聲音其行疾也  
名曰雲雷宮所幸之宮咸以氈綈藉地惡車轍馬跡  
之喧雖惑於微行昵宴在民無勞無怨每乘輿返駕



以愛幸之姬寶衣珍食捨於道傍國人之窮老者皆  
歌萬歲是以鴻嘉永始之間國富家豐兵戈長戢故  
劉向谷永指言切諫於是焚宵遊宮及飛行殿罷宴  
逸之樂所謂從繩則正如轉圜焉

帝常以三秋閑日與飛鷲戲於太液池以沙棠木爲  
舟貴其不沉沒也以雲母飾於鷁首一名雲舟又刻  
大桐木爲虬龍雕飾如真以夾雲舟而行以紫桂爲  
柂柂及觀雲棹水玩擷菱蕖帝每憂輕蕩以驚飛鷲  
命飲飛之士以金鑲纜雲舟於波上每輕風時至飛

鷺始欲隨風入水帝以翠纓結飛鷺之裙常怨曰妾  
微賤何復得預纓裙之遊今太液池尚有避風臺卽  
飛鷺結裙之處

錄曰夫言端履拱嘿者人君之尊也是故興居有  
節進止有度出則太師奏登車之禮入則少師薦  
升堂之儀列旌門以周衛脩清宮以宴息成帝輕  
南面之位微遊嬖幸好惑神仙之事谷永因而抗  
諫書不云乎弗矜細行終累大德斯之謂矣

哀帝尚淫奢多進諂佞幸愛之臣競以粧飾妖麗巧

言取容董賢以霧綃單衣飄若蟬翼帝入宴息之房  
命賢更易輕衣小袖不用奢帶脩裙故使宛轉便易  
也宮人皆効其斷袖又曰割袖恐驚其眠

後漢

明帝陰貴人夢食瓜甚美帝使求諸方國時燉煌獻  
異瓜種恒山獻巨桃核瓜名穹隆長三尺而形屈曲  
味美如飴父老云昔道士從蓬萊山得此瓜云是崆  
峒靈瓜四劫一實百歲母遺於此地世代遐絕其實  
頗在又說巨桃霜下結花隆暑方熟亦云仙人所食

帝使植於霜林園園皆植寒菓積冰之節百菓方盛俗謂之相陵與霜林之聲訛也后曰王母之桃王公之瓜可得而食吾萬歲矣安可植乎后崩內侍者見鏡奩中有瓜桃之核視之涕零疑非其類耳

章帝永寧元年條支國來貢異瑞有鳥名鳩鵲形高七尺解人語其國太平則鳩鵲羣翔昔漢武時四夷賓服有獻馴鵲若有喜樂事則鼓翼翔鳴按莊周云雕陵之鵲蓋其類也淮南子云鵲知人喜今之所記大小雖殊遠近爲異故畧舉焉

安帝好微行於郊垆或露宿起帷宮皆用錦綉文綉  
至永初二年國用不足令吏民入錢者得爲官有瑯  
琊王溥卽王吉之後吉先爲昌邑中尉奕世衰凌及  
安帝時家貧不得仕乃挾竹簡插筆於洛陽市傭書  
美於形貌又多文辭來僦其書者丈夫贈其衣冠婦  
人遺其珠玉一日之中衣寶盈車而歸積粟于廩九  
族宗親莫不仰其衣食洛陽稱爲善筆而得富溥先  
時家貧穿井得鐵印銘曰傭力得富錢至億度一土  
三田軍門主簿後以一億錢輸官得中壘校尉三田

一土壘字也中壘校尉掌北軍壘門故曰軍門主簿  
積善降福明神報焉

靈帝初平三年遊於西園起裸遊館千間采祿苔而  
被堦引渠水以繞砌周流澄澈乘船以遊漾使宮人  
乘之選玉色輕體以執篙楫搖漾於渠中其水清澄  
以盛暑之時使舟覆沒視宮人玉色者又奏招商之  
歌以來涼氣也歌曰涼風起今日照渠青荷晝偃葉  
夜舒惟日不足樂有餘清絲流管歌玉鳧千年萬歲  
喜難踰渠中植蓮大如蓋長一丈南國所獻其葉夜

舒畫卷一莖有四蓮叢生名曰夜舒荷亦云月出則舒也故曰望舒荷帝盛夏避暑於裸遊館長夜飲宴帝嗟曰使萬歲如此則上仙也宮人年二七已上三十六已下皆靚粧解其上衣惟着內服或共裸浴西域所獻茵墀香煮以爲湯宮人以之浴浣使以餘汁入渠名曰流香渠又使內豎爲驢鳴於館北又作鷄鳴堂多畜雞每醉迷於天曉內侍競作鷄鳴以亂真聲也乃以炬燭投於殿前帝乃驚悟及董卓破京師散其美人焚其宮館至魏咸熙中先所投燭處夕夕有

光如星後人以爲神光於此地立小屋名曰餘光祠以祈福至魏明末稍掃除矣

錄曰明章兩主丕承前業風被四海威行八區殊邊異服祥瑞輻輳安靈二帝同爲敗德夫悅目快心罕不淪乎情慾自非遠鑒興亡孰能移隔下情傭才緣心緬乎嗜慾塞諫任邪沒情於淫靡至如列代亡主莫不憑威猛以喪家國肆奢麗以覆宗祀詢考先墳徃徃而載僉求歷古所記非一坂爵鬻官乖分職之本露宿郊居違省方之義成安二



帝載世雖遠而亂政攸同驗之史牒訊諸前記迷情狗馬愛好龍鶴非明王之所聞示於後也內窮淫酷外盡禽荒取悅耳目流貶萬世是以牝妖告禍漢靈以巷伯傾宗酒池裸逐之醜鳴鷄長夜之惑事由商乙遠倣燕丹異代一時可爲悲矣

獻帝伏皇后聰惠仁明有聞於內則及乘輿爲李傕所敗晝夜逃走宮人奔竄萬無一生至河無舟楫后乃負帝以濟河河流迅急惟覺脚下如有乘踐則神物之助焉兵戈逼岸后乃以身擁遏於帝帝傷趾后

以綉紱拭血刮玉釵以覆於瘡應手則愈以淚漚帝  
衣及面潔靜如浣車人歎服雖亂猶有明智婦人精  
誠之至幽祇之所感矣

錄曰夫丹石可磨而不可奪其堅色蘭桂可折而  
不可掩其貞芳伏后履純明之姿懷忠亮之質臨  
危受命壯夫未能加焉知死不恡馮媛之儔也求  
之千古亦所罕聞

漢興至於哀平元成尚以宮室崇苑囿而西京始有  
弘侈東都繼其繁奢卽違米榘不斲之製尤異靈沼

遵儉之風考之皇圖求諸志錄千家萬戶之書臺衛  
城隍之廣自重門構宇以來未有若斯之費溢也孝  
哀廣四時之房靈帝脩裸遊之館妖惑爲之則神怨  
工巧爲之則人虐夷國淪家可爲慟矣及夫靈瑞嘉  
禽艷卉殊木生非其壤詭色訛音不稟正朔之地無  
涉圖書所記或緣德業以來儀由時俗以具質咸得  
而備詳矣歷覽羣經披求方冊未若斯之宏麗矣  
郭况光武皇后之弟也累金數億家僮四百餘人以  
黃金爲噐工冶之聲震於都鄙時人謂郭氏之室不

雨而雷言其鑄鍛之聲盛也庭中起高閣長廡置衛  
石於其上以稱量珠玉也閣下有藏金窟列武士以  
衛之錯雜寶以飾臺榭懸明珠於四垂晝視之如星  
夜望之如月里語曰洛陽多錢郭氏室夜月晝星富  
無匹其寵者皆以玉器盛食故東京謂郭家爲瓊厨  
金穴况小心畏慎雖居富勢閉門優遊未曾干世事  
爲一時之智也

錄曰夫后族之盛專挾內主之威皆以黨彀強盛  
肆置於天下妖幸侵政擅椒房之親在昔魏冉富

傾嬴國漢世王鳳同拜五侯館第僭於京都嫗姬  
麗於宮掖瑰賂南金彌玩於王府緹繡雕文被飾  
於土木高廓洞門極夏屋之盛文馬朱軒窮車服  
之靡自古檀驕未有如斯之例雖三歸移於管室  
八佾陳於季庭方之爲劣矣郭況內憑姻寵外專  
聲厲遠採山丹之穴積陶朱程鄭之產未足稱其  
盛歟曾不恃其戚里矜其財勢秉溫恭之正守道  
持盈而自競慎足可謂知幾其神乎

劉向於成帝之末校書天祿閣專精覃思夜有老人

着黃衣植青藜杖登閣而進見向暗中獨坐誦書老  
父乃吹杖端煙燃因以見向說開闢已前向因受五  
行洪範之文恐辭說繁廣忘之乃裂裳及紳以記其  
言至曙而去向請問姓名云我是太一之精天帝聞  
金卯之子有博學者下而觀焉乃出懷中竹牒有天  
文地圖之書余略授子焉至向子歆從向授其術向  
亦不悟此人焉

賈逵年五歲明惠過人其姊韓瑤之婦嫁瑤無嗣而  
歸居焉亦以貞明見稱聞隣中讀書旦夕抱逵隔籬

而聽之逵靜聽不言姊以爲喜至年十歲乃暗誦六經姊謂逵曰吾家貧困未嘗有教者入門汝安知天下有三墳五典而誦無遺句耶逵曰憶昔姊抱逵於籬間聽隣家讀書今萬不遺一乃剝庭中桑皮以爲牒或題於扉屏且誦且記甚年經文通遍於閭里每有觀者稱云振古無倫門徒來學不遠萬里或襁負子孫舍於門側皆口授經文贈獻者積粟盈倉或云賈逵非力耕所得誦經口倦世所謂舌耕也

何休木訥多智三墳五典陰陽筭術河洛讖緯及遠

年古諺歷代圖籍莫不咸誦也門徒有問者則爲註  
記而口不能說作左氏膏肓公羊廢疾穀梁墨守謂  
之三闕言理幽微非知機藏往不可通焉及鄭康成  
鋒起而攻之求學者不遠千里羸糧而至如細流之  
赴巨海京師謂康成爲經神何休爲學海

任末年十四時學無常師負笈不遠嶮阻每言人而  
不學則何以成或依林木之下編茅爲菴削荆爲筆  
剋樹汁爲墨夜則映星望月暗則縛麻蒿以自照觀  
書有合意者題其衣裳以記其事門徒悅其勤學更



以靜衣易之非聖人之言不視臨終誠曰夫人好學  
雖死若存不學者雖存謂之行尸走肉耳河洛祕奧  
非正典籍所載皆注記於柱壁及園林樹木慕好學  
者來輒寫之時人謂任氏爲經苑

曹曾魯人也本名平慕曾參之行改名爲曾家財巨  
億事親盡禮日用三牲之養一味不虧於是不先親  
而不食新味也爲客於人家得新味則含懷而歸不  
畜雞犬言喧囂驚動於親老時亢旱井池皆竭母思  
甘清之水曾跪而操餅則甘泉自涌清美於常學徒

有貧者皆給食天下名書上古以來文篆訛落者曾  
皆刊正垂萬餘卷及國難旣夷收天下遺書於魯家  
連車繼軌輸於王府諸弟子於門外立祠謂曰曹師  
祠及世亂家家焚廬曾慮先文湮沒乃積石爲倉以  
藏書故謂曹氏爲書倉

錄曰觀乎劉向顯學於漢成時才包三古藝該九  
聖懸日月以來其類少矣逮乎後漢賈任曹之學  
並爲聖神通生民到今蓋斯而已若顏淵之殆庶  
幾關美張霸何足顯大儒哉至如五君之徒孔門

之外未有也方之入室彼有慙焉賈氏之姊所謂  
知識婦人鑒乎聖也

王子年拾遺記卷第六

王子年拾遺記卷第七

晉 隴西王嘉著

梁 蘭陵蕭綺錄

明 新安程榮校

魏

文帝所愛美人姓薛名靈芸常山人也父名鄴爲鄆鄉亭長母陳氏隨鄴舍於亭傍居生窮賤至夜每聚隣婦夜績以麻蒿自照靈芸年至十五容貌絕世隣中少年夜來竊窺終不得見咸熙元年谷習出守常

山郡聞亭長有美女而家甚貧時文帝選良家子女以入六宮習以千金寶賂聘之既得乃以獻文帝靈芸聞別父母歔歔累日淚下霑衣至升車就路之時以玉唾壺承淚壺則紅色既發常山及至京師壺中淚凝如血帝以文車十乘迎之車皆鏤金爲輪輞冊畫其轂輓前有雜寶爲龍鳳銜百子鈴鏘鏘和鳴響於林野駕青色之牛日行三百里此牛尸塗國所獻足如馬蹄也道側燒石葉之香此石重疊狀如雲母其光氣辟惡厲之疾此香腹題國所進也靈芸未至

京師數十里膏燭之光相續不滅車徒咽路塵起蔽於星月時人謂爲塵宵又築土爲臺基高三十丈列燭於臺下名曰燭臺遠望如列星之墜地又於大道之傍一里一銅表高五尺以誌里數故行者歌曰青槐夾道多塵埃龍樓鳳闕望崔嵬清風細雨雜香來土上出金火照臺此七字是妖辭也爲銅表誌里數於道側是土上出金之義以燭置臺下則火在土下之義漢火德王魏土德王火伏而土興土上出金是魏滅而晉興也靈芸未至京師十里帝乘雕王之輦

以望車徒之盛嗟曰昔者言朝爲行雲暮爲行雨今  
非雲非雨非朝非暮改靈芸之名曰夜來入宮後居  
寵愛外國獻火珠龍鸞之釵帝曰明珠翡翠尚不能  
勝况乎龍鸞之重乃止不進夜來妙於鍼工雖處於  
深帷之內不用燈燭之光裁製立成非夜來縫製帝  
則不服宮中號爲鍼神也

錄曰五帝之運迭相生死起伏因循顯於言端童  
謠信於春秋讖辭煩於漢末或著明先典或託見  
圖記僉詳河洛應運不同唐堯以炎正禪虞大漢

以火德受魏世歷公襲得其宜矣夫升名藉璧因  
事而來既而柔曼之質見進亦以裁縫之妙要寵  
媚斯婉約榮非世載取或一朝去彼疑賤延此華

軒

魏明帝起凌雲臺躬自掘土羣臣皆負畚鍤天陰凍  
寒死者相枕洛鄴諸鼎皆夜震自移又聞宮中地下  
有怨歎之聲高堂隆等上表諫曰王者宜靜以養民  
今嗟嘆之聲形於人鬼願省薄奢費以敦儉朴帝猶  
不止廣求瑰異珍賂是聚飭臺榭累年而畢諫者尤



多帝乃去煩歸儉死者收而葬之人神致感衆祥皆  
應太山下有連理文石高十二丈狀如栢樹其文彪  
發似人雕鏤自下及上皆合而中開廣六尺望若真  
樹也父老云當秦末二石相去百餘步蕪沒無有蹊  
徑及魏帝之始稍覺相近如雙闕土王陰類魏爲土  
德斯爲靈徵苑囿及民家草樹皆生連理有合歡草  
狀如著一株百莖晝則衆條扶踈夜則合爲一莖萬  
不遺一謂之神草沛國有黃麟見於戊己之地皆土  
德之嘉瑞乃脩戊己之壇黃星炳夜又起昂畢之臺

祭祀此星魏之分野歲時脩祀焉

任城王彰武帝之子也少而剛毅學陰陽緯候之術  
誦六經洪範之書數千言武帝謀伐吳蜀問彰取便  
利行師之決王善左右射學擊劍百步中髭髮時樂  
浪獻虎文如錦斑以鐵爲檻梟殷之徒莫敢視彰曳  
虎尾以繞臂虎弭耳無聲莫不服其神勇時南越獻  
白象子在帝前彰手頓其鼻象伏不動文帝鑄萬斤  
鍾置崇華殿欲徙之力士百人不能動彰乃負之而  
趨四方聞其神勇皆寢兵自固帝曰以王之雄武吞

併巴蜀如鴟銜腐鼠耳彰薨如漢東平王葬禮及喪  
出空中聞數百人泣聲送者皆言昔亂軍相傷殺者  
皆無棺槨王之仁惠取其朽骨死者坎於地精靈知  
感故人美王之德國史撰任城王舊事三卷晉初藏  
於祕閣

建安三年胥徒國獻沉明石雞色如丹大如鷲常在  
地中應時而鳴聲能遠徹其國聞鳴乃殺牲以祀之  
當鳴處掘地則得此雞若天下太平翔飛頡頏以爲  
嘉瑞亦爲寶雞其國無雞犬聽地中候晷刻道家云

昔仙人桐君採石入穴數里得丹石雞舂碎爲藥服之者令人有聲氣後天而死昔漢武帝寶鼎元年西方貢珍怪有琥珀鸞置之靜室自於室中鳴翔蓋此類也洛書云皇圖之寶土德之徵大魏之嘉瑞

明帝卽位二年起靈禽之園遠方國所獻異鳥珍獸皆畜此園也昆明國貢嗽金鳥人云其地去燃洲九千里出此鳥形如雀而色黃羽毛柔密常翱翔海上羅者得之以爲至祥聞大魏之德被於荒遠故越山航海來獻大國帝得此鳥畜於靈禽之園飴以真珠

飲以龜腦鳥常吐金屑如粟鑄之可以爲器昔漢武帝時有人獻神雀蓋此類也此鳥畏霜雪乃起小屋處之名曰辟寒臺皆用水精爲戶牖使內外通光宮人爭以鳥吐之金用飾釵珮謂之辟寒金故宮人相嘲曰不服辟寒金那得帝王心於是媚惑者亂爭此寶金爲身飾及行卧皆懷挾以要寵幸也魏氏喪滅池臺鞠爲煨燼嗽金之鳥亦自翔翔

咸熙二年宮中夜異獸白色光潔繞宮而行闔宦見之以聞於帝帝曰宮闈幽密若有異獸皆非祥也使

宦者伺之果見一白虎子遍房而走候者以戈投之  
卽中左目比往取視惟見血在地不復見虎搜檢宮  
內及諸池并不見有物次檢寶庫中得一玉虎頭枕  
眼有傷血痕尚濕帝該古博聞云漢誅梁冀得一玉  
虎頭枕云單池國所獻檢其額下有篆書字云是帝  
辛之枕嘗與妲已同枕之是殷時遺寶也又按五帝  
本紀云帝辛殷代之末至咸熙多歷年所代代相傳  
凡珍寶久則生精靈必神物憑之也

魏禪晉之歲北闕下有白光如鳥雀之狀時飛翔來

去有司聞奏帝所羅之得一白鷺以爲神物於是以  
金爲樊置於宮中旬日不知所在論者云金德之瑞  
昔師曠時有白鷺來巢檢瑞應圖果如所論白色叶  
於金德師曠晉時人也古今之義相符焉

薛夏天水人也博學絕倫母孕夏時夢人遺之一篋  
衣云夫人必產賢明之子也爲帝王之所崇母記所  
夢之日及生夏之年以弱冠才辯過人魏文帝與之  
講論終日不息應對如流無有疑滯帝曰昔公孫龍  
稱爲辯捷而迂誕誣妄今子所說非聖人之言不談

子游子夏之儔不能過也若仲尼在魏復爲入室焉  
帝手制書與夏題云入室生位至祕書丞居生甚貧  
帝解御衣以賜之果符元所夢名冠當時爲一代高  
士

田疇比平人也劉虞爲公孫瓚所害疇追慕無已往  
虞墓設雞酒之禮慟哭之音動於林野翔鳥爲之悽  
鳴走獸爲之吟伏疇卧於草間忽有人通云劉幽州  
來欲與日子泰言平生之事疇神悟遠識知是劉虞  
之魂旣近而拜疇泣不自支因相與進雞酒疇醉虞



曰公孫瓚求子甚急宜竄伏以避害疇拜曰聞君臣  
之義生則盡禮今見君之靈願得同歸九地死且不  
朽安可逃乎虞曰子萬古之貞士也深慎爾儀奄然  
不見疇亦醉醒

曹洪武帝從弟家盈產業駿馬成羣武帝討董卓夜  
行失馬洪以其所乘馬讓帝其馬號曰白鵠此馬走  
時惟覺耳中風聲足似不踐地至汴水洪不能渡帝  
引洪上馬共濟行數百里瞬息而至馬足毛不濕時  
人謂乘風而行亦一代神駿也諺曰憑空虛躍曹家

白鴿

錄曰王者廓萬宇以爲邦家因海岳以爲城池固  
是安民養德垂拱而治焉去乎遊歷之費導於敦  
教之道無崇宮室有薄林園采椽不斲陶唐如斯  
昭儉卑宮菲食伯禹以之戒奢迄今三代之王失  
斯道矣傷財弊力以驕麗相誇瓊室之侈壁臺之  
富窮神工之竒妙人力勤苦至於春秋王室凌廢  
城者作謳疲於勤勞晉築斯禡之宮爲功動於民  
怨宋興澤門之役勞者以爲深嗟姑蘇積費於前

阿房奢竭於後自以業固河山名超萬世覆滅宗  
祀由斯哀哀竊觀明帝踐中區之沃盛威靈所懾  
比強列代禎祥神寶史不絕書殊方珍貢府無虛  
月鼎據三方稱雄四海而聖教微於堯禹歷代劣  
於姬漢東鯁閩吳西病邛蜀師旅歲興財力目費  
不能遵養黎元遠瞻前朴宮室窮麗池榭肆其宏  
廣終取夷滅數其然哉任成淵謀神勇智周祥藝  
雖來舟蓬蒙劔射之好不能加也田疇事死如生  
守以直節精誠之至通於神明曹洪忠烈爲心愛

親憂國此穆滿之駿方之白鵠可謂齊足者也

王子年拾遺記卷第七



王子年拾遺記卷第八

晉 隴西王嘉著

梁 蘭陵蕭綺錄

明 新安程榮校

吳

孫堅母姪堅之時夢腸出繞腰有一童女負之繞吳  
閭門外又授以芳茅一莖童女語曰此善祥也必生  
才雄之子今賜母以土王於冀軫之地鼎足於天下  
百年中應於異寶授於人也語畢而覺旦起筮之筮

者曰所夢童女負母繞閭門是太白之精感化來夢  
夫帝王之興必有神跡自表白氣者金色及吳滅而  
踐晉祚夢之徵焉

錄曰按吳書云孫堅母懷堅之時夢腸出繞閭門  
與王子之說爲異夫西方金位以叶晉德興亡之  
兆後而効焉蓋表吳亡而授晉也夫六夢八徵著  
明周易授蘭懷日事類而非及吳氏之興年嘉禾  
之號芳茅之徵信矣至晉太康元年孫皓送六金  
璽云時無王工故以金爲印璽夫孫氏擅割江東

包卷百越吞席漢陽威揚中夏富強之業三雄比  
盛時有未賓而兵戈歲起每梗心於邛蜀憤慨於  
燕魏四方未夷有事征伐因之以師旅遵之以儉  
素去以遊侈之費塞茲雕靡之塗不欲使四方民  
勞非無王工也固能輕彼池山賤斯棘實漢鄙盈  
車之屑燕葉璞於衡蕪沉河底谷義昭攸古務崇  
簡約豈非高歟及乎吳亡時以六代金璽歸晉堅  
母之夢驗矣

吳主趙夫人丞相達之妹善畫巧妙無雙能於指間



以綵絲織雲霞龍蛇之錦大則盈尺小則方寸宮中  
謂之機絕孫權常歎魏蜀未夷軍旅之隙思得善畫  
者使圖山川地勢軍陣之像達乃進其妹權使寫九  
州江湖方岳之勢夫人曰丹青之色甚易歇滅不可  
久寶妾能刺繡作列國方帛之上寫以五岳河海城  
邑行陣之形既成乃進於吳主時人謂之針絕雖棘  
刺木猴雲梯飛鳩無過此麗也權居昭陽宮倦暑乃  
褰紫綃之帷夫人曰此不足貴也權使夫人指其意  
思焉荅曰妾欲窮慮盡思能使下綃帷而清風自入

視外無有蔽礙列侍者飄然自涼若馭風而行也權  
稱善夫人乃拊髮以神膠續之神膠出鬱夷國接弓  
弩之斷弦百斷百續也乃織爲羅縠累月而成裁爲  
幔內外視之飄飄如煙氣輕動而房內自涼時權常  
在軍旅每以此幔自隨以爲征幙舒之則廣縱一丈  
卷之則可內於枕中時人謂之絲絕故吳有三絕四  
海無儔其妙後有貪寵求媚者言夫人幻耀於人主  
因而致退黜雖見疑墜猶存錄其巧工吳亡不知所  
在

吳主潘夫人父坐法夫人輸入織室容態少儔爲江東絕色同幽者百餘人謂夫人爲神女敬而遠之有司聞於吳主使圖其容貌夫人憂戚不食減瘦改形工人寫其真狀以進吳主見而喜悅以虎魄如意撫按卽折嗟曰此神女也愁貌尚能惑人况在懽樂乃命雕輪就織室納于後宮果以姿色見寵每以夫人遊昭宣之臺志意幸愜旣盡酣醉唾於玉壺中使侍婢瀉於臺下得火齊指環卽挂石榴枝上因其處起臺名曰環榴臺時有諫者云今吳蜀爭雄還劉之名

將爲妖矣權乃翻其名曰榴環臺又與夫人遊釣臺  
得大魚王大喜夫人曰昔聞泣魚今乃爲喜有喜必  
憂以爲深戒至于末年漸相諧毀稍見離退時人謂  
夫人知幾其神吳主於是罷宴夫人果見棄逐釣臺  
基今尚存焉

錄曰趙潘二夫人妍明伎藝婉孌通神柳亦漢遊  
洛妃之儔荆巫雲雨之類而能避妖幸之雙覩進  
退之機夫盈則有虧道有崇替居盛必衰理故明  
矣語乎榮悴譬諸草木華落張弛勢之必然巧言

姜斐前王之所信惑是以申褒見列於前周班趙  
載詳於徃漢異代同聞可爲歎也

黃龍元年始都武昌時越雋之南獻背明鳥形如鶴  
止不向明巢常對比多肉少毛聲音百變聞鐘磬笙  
竽之聲則奮翅搖頭時人以爲吉神是歲遷都建業  
殊方多貢珍奇吳人語訛呼背明爲背亡鳥國中以  
爲大妖不及百年當有喪亂背叛滅亡之事散逸奔  
逃墟無煙火果如斯言後此鳥不知所在

張承之母孫氏懷承之時乘輕舟遊於江浦之際忽

有白蛇長三尺騰入舟中母祝曰若爲吉祥勿毒噬  
我縈而將還置諸房內一宿視之不復見蛇嗟而惜  
之鄰中相謂曰昨見張家有一白鶴聳翮入雲以告  
承母母使筮之筮者曰此吉祥也蛇鶴延年之物從  
室入雲自下升高之象也昔吳王闔閭葬其妹殉以  
美女珍寶異劔窮江南之富未及十年雕雲覆於溪  
谷美女遊於塚上白鵠翔於林中白虎嘯於山側皆  
昔時之精靈今出於世當使子孫位超臣極擅名江  
表若生子可以名曰白鵠及承生位至丞相輔吳將

拾遺記 卷八  
軍年踰九十蛇鵠之祥也

錄曰國之將亡其兆先見傳曰明神降之觀其德也及歸命面縛來降斯爲効矣蛇鵠者蠱禽之最靈張氏以爲嘉瑞吳越春秋百家雜說云吳王闔閭崇飾厚葬生埋美人多藏寶物數百年後靈翔於林壑神虎嘯於山丘湛盧之劍飛入於楚收魂聚怪富麗以極而詭異失中不如速朽昔宋桓盛姬前史譏其驕惑羸博揚孫君子貴其合禮觀夫遠古恒詳中代末諸事迹儉恭相懸至如末世漸

相誇矯生恣淫酒死則同殉委積珍寶埃塵滅身  
乖於同穴可謂歎歎

呂蒙入吳吳主勸其學業蒙乃博覽羣籍以易爲宗  
常在孫策座上酣醉忽卧於夢蒙誦周易一部俄而  
驚起衆人皆問之蒙曰向夢見伏羲周公文王與我  
論世祚興亡之事日月貞明之道莫不窮精極妙未  
該玄旨故空誦其文耳衆座皆云呂蒙嚙語通周易  
錄曰夫精誠之至叶于幽冥與日月均其明與四  
時齊其契故能德會三古道合神微若鄭君之感



先聖周盤之夢東里迹同事異光彼遐策索隱鈞  
深妙於玄旨孔門羣說未若呂生之學焉

孫和悅鄧夫人常置膝上和於月下舞水精如意悞  
傷夫人頰血流污袴嬌姹彌苦自舐其瘡命太醫合  
藥醫曰得白獺髓雜王與琥珀屑當滅此痕即購致  
百金能得白獺髓者厚賞之有富春渙人云此物知  
人欲取則逃入石穴伺其祭魚之時獺有鬪死者穴  
中應有枯骨雖無髓其骨可合玉春爲粉散於瘡上  
其痕則滅和乃命合此膏琥珀太多及差而有赤點

如朱逼而視之更益其研諸嬖人欲要寵皆以丹脂點頰而後進幸妖惑相動遂成淫俗

孫亮作琉璃屏風甚薄而瑩澈每於月下清夜舒之常與愛姬四人皆振古絕色一名朝姝二名麗居三名洛珍四名潔華使四人坐屏風內而外望之如無隔惟香氣不通於外爲四人合四氣香殊方異國所出凡經踐躡宴息之處香氣沾衣歷年彌盛百浣不歇因名曰百濯香或以人名香故有朝姝香麗居香洛珍香潔華香亮每遊此四人皆同輿席來侍皆以

香名前後爲次不得亂之所居室名爲思香媚寢

蜀

先主甘后沛人也生於賤微里中相者云此女後貴位極宮掖及后長而體貌特異至十八玉質柔肌態媚容冶先主召入綃帳中於戶外望者如月下聚雪河南獻玉人高三尺乃取玉人置后側晝則講說軍謀夕則擁后而玩玉人常稱玉之所貴德比君子况爲人形而不可玩乎后與玉人潔白齊潤觀者殆相亂惑嬖寵者非惟嫉於甘后亦妬於玉人也后常欲

琢毀壞之乃誠先主曰昔子罕不以玉爲寶春秋美  
之今吳魏未滅安以妖玩繼懷凡淫惑生疑勿復進  
焉先主乃撤玉人像嬖者皆退當斯之時君子議以  
甘后爲神智婦人焉

縻竺用陶朱計術日益億萬之利貨擬王家有寶庫  
千間竺性能賑生卹死家內馬廐屋仄有古塚有伏  
尸夜聞涕泣聲竺乃尋其泣聲之處忽見一婦人袒  
背而來訴云昔漢末妾爲赤眉所害叩棺見剝今袒  
在地羞晝見人垂二百年今就將軍乞深埋并焚衣

以掩形體竺許之卽命之爲棺槨以青布爲衣衫置於塚中設祭旣畢歷一年行於路西忽見前婦人所着衣皆是青布語竺曰君財寶可支一世合遭火厄今以青蘆杖一枚長九尺報君棺槨衣服之惠竺挾杖而歸所住隣中常見竺家有青氣如龍蛇之形或有人謂竺曰將非怪也竺乃疑此異問其家僮云時見青蘆杖自出門間疑其神不敢言也竺爲性多忌信厭術之事有言中忤卽加刑戮故家僮不敢言竺貨財如山不可筭計內以方諸盆餅設大珠如卵散

滿於庭謂之寶庭而外人不得窺數日忽青衣童子  
數十人來云糜竺家當有火厄萬不遺一賴君能恤  
歛枯骨天道不辜君德故來禳卻此火當使財物不  
盡自今已後亦宜防衛竺乃掘溝渠周繞其庫旬日  
火從庫內起燒其珠玉十分之一皆是陽燧旱燥自  
能燒物火盛之時見數十青衣童子來撲火有青氣  
如雲覆於火上卽滅童子又云多聚鶴鳥之類以禳  
火災鶴能水於巢上也家人乃收鵙鵲數千頭養於  
池渠中以厭火竺歎曰人生財運有限不得盈溢懼

爲身之患害時三國交鋒軍用萬倍乃輸其寶物車服以助先主黃金一億斤錦繡氈罽積如丘壘駿馬萬疋及蜀破後無復所有飲恨而終

周羣妙閑美術識說遊岷山採藥見一白猿從絕峰而下對羣而立羣抽所佩書刀投猿猿化爲一老翁握中有玉版長八寸以授羣羣問曰公是何年生荅曰已衰邁也忘其年月猶憶軒轅之時始學歷數風后容成皆黃帝之史就余授曆術至顓頊時考定日月星辰之運尤多差異及春秋時有子韋子野裨竈

之徒權略雖驗未得其門邇來世代興亡不復可記  
因以相襲至大漢時有洛下閎頗得其旨羣服其言  
更精勤筭術及考校年曆之運驗於圖緯知蜀應滅  
及明年歸命奔吳皆云周羣詳陰陽之精妙也蜀人  
謂之後聖白猿之具有似越人所記而事皆迂誕似  
是而非

錄曰孫和孫亮劉備竝惑於淫寵之玩忘於軍旅  
之略猶比强大魏尅代無功可爲嗟矣周羣之學  
通於神明白猿之祥有類越人問劔之言其事迂



誕若是而非也夫陰陽遞升五常迭用由水火相生亦以相滅淮南子云方諸向月津爲水以厭火災孚縻氏富於珍竒削方諸爲鳥獸之狀猶土龍以祈雨也鷓鴣之音與方諸相亂蓋聲之訛矣羽毛之類非可禦烈火於義則爲乖於事則違類先墳舊典說以其詳焉

王子年拾遺記卷第八

王子年拾遺記卷第九

晉隴西王嘉著

梁蘭陵蕭綺錄

明新安程榮校

晉時事

武帝爲撫軍時府內後堂砌下忽生草三株莖黃葉  
綠若總金抽翠花條苒弱狀似金盞時人未知是何  
祥草故隱蔽不聽外人窺視有一羗人姓姚名馥字  
世芬充廐養馬妙解陰陽之術云此草以應金德之

瑞馥年九十八姚襄則其祖也馥好讀書嗜酒每醉  
時好言帝王興亡之事善戲笑滑稽無窮常歎云九  
河之水不足以漬麴蘖八藪之木不足以作薪蒸七  
澤之麋不足以充庖俎凡人稟天地之精靈不知飲  
酒者動肉含氣耳何必木偶於心識乎好啜濁糟常  
言渴於醇酒羣輩常弄狎之呼爲渴羗及晉武踐位  
忽思見馥立於階下帝奇其倜儻擢爲朝歌邑宰馥  
辭曰老羗異域之人遠隔山川得遊中華已爲殊幸  
請辭朝歌之縣長充養馬之役時賜美酒以樂餘年

帝曰朝歌紂之故都地有美酒故使老羗不復呼渴  
馥於堦下高聲而對曰馬圉老羗漸染皇化溥天夷  
貊皆爲王臣今若歡酒池之樂更爲殷紂之民乎帝  
撫王几大悅卽遷酒泉太守地有清泉其味若酒馥  
乘醉而拜受之遂爲善政民爲立生祠後以府地賜  
張華猶有草在故茂先金荳賦云擢九莖於漢庭美  
三株於茲館貴表祥乎金德比名類乎相亂至惠帝  
元熙元年三株草化爲三樹枝葉似楊樹高五尺以  
應三楊擅權之事時有楊駿楊瑤楊濟三弟兄號曰

三楊馬圉醉羗所說之驗

錄曰不得中行狂狷可也淳于優孟之儔因俳說以進諫至如姚馥才性容貌不與華同片言竊諷媚足規範及其俳諧詭譎推辭指誠因物而刺言之者無罪抑亦東方曼倩之儔歟夫心胃之逸朽故有腐腸爛腸之嗜是以五味令人口爽老氏以爲深誠未若甘並桂石美斯松草含吐煙霞咀食沆瀣迅千靈於一朝方塵劫於俄頃乎可淫此酣樂忘彼久視者乎夫物有事異而名同者自非窮

神達理莫能遙照豈可假於詖辭專求於邪說天命有兆歷運攸歸何可妄信於謠訛指怪於織草將溺所聞信諸厥術可爲嗟乎

咸寧四年立芳蔬園於金墉城東多種異菜有菜名曰芸薇類有三種紫色者最繁味辛其根爛熳春夏葉密秋葉冬馥其實若珠五色隨時而盛一名芸芝其色紫爲上蔬其味辛色黃爲中蔬其味甘色青者爲下蔬其味鹹常以三蔬充御膳其葉可以藉飲食以供宗廟祭祀亦止人渴飢宮人採帶其莖香氣歷

日不歇

錄曰大雅云言采其薇此之類也草木疏云其實如豆昔孤竹二子避世不食周粟於首陽山采薇而食疑是卉或云神類非一彌相惑亂可以療飢其色必紫百家雜說意旨相符論其形品詳斯香色雖移植芳圃芬美莫儔故薰蘭有質物性無改產乖本地逾見芬烈譬諸薑桂豈因地而辛矣當此一代是謂仙蔬寔爲神異

張華爲九醞酒以三薇漬麴蘖蘖出西羌麴出北胡

胡中有指星麥四月火星出麥熟而獲之蘖用水漬  
麥三夕而萌芽平旦雞鳴而用之俗人呼爲雞鳴麥  
以之釀酒醇美久含令人齒動若大醉不叫笑搖蕩  
令人肝腸消爛俗人謂爲消腸酒或云醇酒可爲長  
宵之樂兩說同而事異也閭里歌曰寧得醇酒消腸  
不與日月齊光言耽此美酒以悅一時何用保守靈  
而取長久至懷帝末民間園圃皆生蒿棘狐兔遊聚  
至元熙元年太史令高堂忠奏熒惑犯紫微若不早  
避當無洛陽乃詔內外四方及京邑諸宮觀林衛之



內及民間園囿皆植紫薇以爲厭勝至劉石姚符之末此蒿棘不除自絕也

晉太康元年白雲起於灞水三日而滅有司奏云天  
下應太平帝問其故曰昔舜時黃雲興於郊野夏代  
白雲蔽於都邑殷代玄雲覆於林藪斯皆應世之休  
徵殊鄉絕域應有貢其方物也果有羽山之民獻火  
浣布萬疋其國人稱羽山之山有文石生火煙色以  
隨四時而見名爲淨火有不潔之衣投於火石之上  
雖滯污漬溼皆如新浣當虞舜時其國獻黃布漢末

獻赤布梁冀製爲衣謂之丹衣史家云單衣今縫掖也字異聲同未知孰是

錄曰帝王之興叶休祥之應天無隱祥地無蓄寶是以因神物以表運見星雲以觀德按周官有馮相氏以觀祥錄之數晉以金德故白雲起於灞水山海經及異物志云燃洲之獸生於火中以毛織爲布雖有垢膩投火則潔淨也兩說不同故偕錄焉

因墀國獻五足獸狀如師子玉錢千緡其形如環環

重十兩上有天壽永吉之字問其使者五足獸是何  
變化對曰東方有解形之民使頭飛於南海左手飛  
於東山右手飛於西澤自臍已下兩足孤立至暮頭  
還肩上兩手遇疾風飄於海外落玄洲之上化爲五  
足獸則一指爲一足也其人旣失兩手使傍人割裏  
肉以爲兩臂宛然如舊也因墀國在西域之北送使  
者以鐵爲車輪十年方至晉及還輪皆絕銳莫知其  
遠近也

太始元年魏帝爲陳留王之歲有頻斯國人來朝以

五色玉爲衣如今之鎧其使不食中國滋味自齋金  
壺壺中有漿凝如脂嘗一滴則壽千歲其國有大楓  
木成林高六七十里善美者以里計之雷電常出樹  
之半其枝交蔭於上蔽不見日月之光其下平淨掃  
灑雨霧不能入焉樹東有大石室可容萬人坐壁上  
刻爲三皇之像天皇十三頭地皇十一頭人皇九頭  
皆龍身亦有膏燭之處緝石爲床床上有膝痕深三  
寸床上有竹簡長尺二寸書大篆之文皆言開闢以  
來事人莫能識或言是伏羲畫卦之時有此書或言

是蒼頡造書之處傍有丹石井非人之所鑿下及漏  
泉水常沸湧諸僊欲飲之時以長綆引汲也其國人  
皆多力不食五穀日中無影飲桂漿雲霧羽毛爲衣  
髮大如縷堅韌如筋伸之幾至一丈置之自縮如蠶  
續人髮以爲繩汲丹井之水久久方得升之水水中  
有白蛙兩翅常來去井上仙者食之至周王子晉臨  
井而窺有青雀銜玉杓以授子晉子晉取而食之乃  
有雲起雪飛子晉以衣袖揮雲則雲雪自止白蛙化  
爲雙白鳩入雲望之遂滅皆頻斯國之所記蓋其人

年不可測也使圖其國山川地勢瑰異之屬以示張  
華華云此神異之國難可驗信以車馬珍服送之出  
關

張華字茂先挺生聰慧之德好觀祕異圖緯之部摺  
採天下遺逸自書契之始考驗神怪及世間閭里所  
說造博物志四百卷奏於武帝帝詔詰問卿才綜萬  
代博識無倫遠冠羲皇近次夫子然記事採言亦多  
浮妄宜更刪翦無以冗長成文昔仲尼刪詩書不及  
鬼神幽昧之事以言怪力亂神今卿博物志驚所未

聞異所未見將恐惑亂於後生繁蕪於耳目可更芟  
截浮疑分爲十卷卽於御前賜青鐵硯此鐵是于闐  
國所出獻而鑄爲硯也賜麟角筆以麟角爲筆管此  
遼西國所獻側理紙萬番此南越所獻後人言陟里  
與側理相亂南人以海苔爲紙其理縱橫邪側因以  
爲名帝常以博物志十卷置於函中暇日覽焉

惠帝元熙二年改爲永平元年常山郡獻傷魂鳥狀  
如雞毛色似鳳帝惡其名棄而不納復愛其毛羽當  
時博物者云黃帝殺蚩尤有羆虎誤噬一婦人七日

氣不絕黃帝哀之葬以重棺石槨有鳥翔其塚上其  
聲自呼爲傷魂則此婦人之靈也後人不得其令終  
者此鳥來集其國園林之中至漢哀平之末王莽多  
殺伐賢良其鳥亟來哀鳴時人疾此鳥名使常山郡  
國彈射驅之至晉初干戈始戢四海攸歸山野間時  
見此鳥憎其名改傷魂爲相弘及封孫皓爲歸命侯  
相弘之義叶於此矣永平之末死傷多故門嗟巷哭  
常山有獻遂放逐之

太始十年有浮支國獻望舒草其色紅葉如荷近望



拾遺記 卷九  
則如卷荷遠望則如舒荷團團似蓋亦云月出則葉舒月沒則葉卷植於宮中因穿池廣百步名曰望舒荷池愍帝之末移入胡胡人將種還胡中至今絕矣池亦填塞

祖梁國獻蔓金苔色如黃金若縈聚之大如雞卵投於水中蔓延於波瀾之上光出照日皆如火生水上也乃於宮中穿池廣百步時觀此苔以樂宮人宮人有幸者以金苔賜之置漆盤中照耀滿室名曰夜明苔著衣襟則如火先帝慮外人得之有惑百姓詔使

除苔塞池及皇家喪亂猶有此物皆在胡中

石季倫愛婢名翔風魏末於胡中得之年始十歲使房內養之至十五無有比其容貌特以姿態見美妙別王聲巧觀金色石氏之富方比王家驕侈當世珍寶竒異視如瓦礫積如糞土皆殊方異國所得莫有辯識其出處者乃使翔風別其聲色悉知其處言西方北方王聲沈重而性溫潤佩服者益人性靈東方南方王聲輕潔而性清涼佩服者利人精神石氏侍人美艷者數千人翔風最以文辭擅愛石崇嘗語之

拾遺言 卷九  
曰吾百年之後當指白日以汝爲殉荅曰生愛死離  
不如無愛妾得爲殉身其何朽於是彌見寵愛崇常  
擇美容姿相類者十人裝飾衣服大小一等使忽視  
不相分別常侍於側使翔風調玉以付工人爲倒龍  
之珮縈金爲鳳冠之釵言刻玉爲倒龍之勢鑄金釵  
象鳳皇之冠結袖繞楹而舞晝夜相接謂之恒舞欲  
有所召不呼姓名悉聽珮聲視釵色玉聲輕者居前  
金色艷者居後以爲行次而進也使數十人各含異  
香行而語笑則口氣從風而颺又屑沉水之香如塵

末布象床上使所愛者踐之無迹者賜以真珠百琲  
有迹者節其飲食令身輕弱故閨中相戲曰爾非細  
骨輕軀那得百琲真珠及翔風年三十妙年者爭嫉  
之或者云胡女不可爲羣競相排毀石崇受譖潤之  
言卽退翔風爲房老使主羣少乃懷怨而作五言詩  
曰春華誰不美卒傷秋落時突烟還自低鄙退豈所  
期桂芳徒自蠹失愛在蛾眉坐見芳時歇憔悴空自  
嗤石氏房中並歌此爲樂曲至晉末乃止

石虎於太極殿前起樓高四十丈結珠爲簾垂五色

王珮風至鏗鏘和鳴清雅盛夏之時登高樓以望四  
極奏金石絲竹之樂以日繼夜於樓下開馬埒射場  
周迴四百步皆文石丹沙及彩畫於埒傍聚金玉錢  
貝之寶以賞百戲之人四廂置錦幔屋柱皆隱起爲  
龍鳳百獸之形雕斲衆寶以飾楹柱夜往往有光明  
集諸羌互於樓上時亢旱春雜寶異香爲屑使數百  
人於樓上吹散之名曰芳塵臺上有銅龍腹容數百  
斛酒使胡人於樓上嗽酒風至望之如露名曰粘雨  
臺用以灑塵樓上戲笑之聲音震空中又爲四時浴

室用鋤石斌珠爲堤岸或以琥珀爲餅杓夏則引渠水以爲池池中皆以紗縠爲囊盛百雜香漬於水中嚴冰之時作銅屈龍數千枚各重數十斤燒如火色投於水中則池水恆溫名曰焦龍溫池引鳳文錦步障縈蔽浴所共宮人寵嬖者解媠服宴戲彌於日夜名曰清嬉浴室浴罷洩水於宮外水流之所名溫香渠渠外之人爭來汲取得升合以歸其家人莫不怡悅至石氏破滅焦龍猶在鄴城池今夷塞矣

錄曰居室見妬故亦姦巧之恆情因嬌酒嬖而菲

錦之辭入至於惑聽邪諂豈能隔於求媚憑歡藉  
幸緣和嫵而相容是以先寵未退盛衰之萌兆矣  
一朝愛退皎日之誓忽焉清奏薄言怨刺之辭乃  
作石崇功擅時資財業傾世遂乃歌擬房中樂稱  
恒舞季庭管室豈獨古之貶乎石虎席卷西京崇  
麗妖虐外僭和鸞文物之儀內修三英九華之號  
靈祥遠貢光耀舊都珠璣丹紫飾備於土木自古  
以來四夷侵掠驕奢僭暴擅位偷安富有之業莫  
此比焉

王子年拾遺記卷第九

王子年拾遺記卷第十

晉隴西王嘉著

梁蘭陵蕭綺錄

明新安程榮校

崑崙山

崑崙山有昆陵之地其高出日月之上山有九層每層相去萬里有雲色從下望之如城闕之象四面有風羣仙常駕龍乘鶴遊戲其間四面風者言東南西北一時俱起也又有祛塵之風若衣服塵污者風至



吹之衣則淨如浣濯甘露濛濛似霧著草木則滴瀝如珠亦有朱露望之色如丹著木石赭然如朱雪灑焉以瑤噐承之如飴崑崙山者西方曰須彌山對七星之下出碧海之中上有九層第六層有五色玉樹陰翳五百里夜至水上其光如燭第三層有禾稊一株滿車有瓜如桂有奈冬生如碧色以玉井水洗食之骨輕柔能騰虛也第五層有神龜長一尺九寸有四翼萬歲則升木而居亦能言第九層山形漸小狹下有芝田蕙圃皆數百頃羣仙種耨焉傍有瑤臺十

二谷廣千步皆五色玉爲臺基最下層有流精霄間  
直上四十丈東有風雲雨師閨南有丹密雲望之如  
丹色丹雲四垂周密西有螭潭多龍螭皆白色千歲  
一蛻其五臟此潭左側有五色石皆云是白螭腸化  
成此石有琅玕璆琳之玉煎可以爲脂北有珍林別  
出折枝相扣音聲和韻九河分流南有赤陂紅波千  
劫一竭千劫水乃更生也

蓬萊山

蓬萊山亦名防丘亦名雲來高二萬里廣七萬里水

拾遺記 卷十  
淺有細石如金玉得之不加陶冶自然光淨仙者服  
之東有鬱夷國時有金霧諸仙說此上常浮轉低昂  
有如山上架樓室常向明以開戶牖及霧滅歇戶皆  
向北其西有含明之國綴鳥毛以爲衣承露而飲終  
天登高取水亦以金銀蒼環水精火藻爲階有冰水  
沸水飲者千歲有大螺名輶步負其殼露行冷則復  
入其殼生卵著石則軟取之則堅明王出世則浮於  
海際焉有葭紅色可編爲席溫柔如麩毳焉有鳥名  
鴻鵠色似鴻形如禿鶩腹內無腸羽翮附骨而生無

皮肉也雄雌相眄則生產南有鳥名鴛鴦形似鴈徘徊雲間棲息高岫足不踐地生於石穴中萬歲一交則生雛千歲銜毛學飛以千萬爲羣推其毛長者高者萬里聖君之世來入國郊有浮筠之籐葉青莖紫子大如珠有青鸞集其上下有沙礪細如粉柔風至葉條翻起拂細沙如雲霧仙者來觀而戲焉吹風竹葉聲如鐘磬之音

方丈山

方丈之山一名巒雉東方龍場地地方千里王瑤爲林

雲色皆紫有龍皮骨如山阜散百頃遇其蛻骨之時  
如生龍或云龍常鬪此處膏血如水流膏色黑者著  
草木及諸物如淳漆也膏色紫先著地凝堅可爲寶  
器燕昭王二年海人乘霞舟以雕壺盛數斗膏以獻  
昭王王坐通雲之臺亦曰通霞臺以龍膏爲燈光耀  
百里烟色丹紫國人望之咸言瑞光世人遙拜之燈  
以火浣布爲纏山西有照石去石十里視人物之影  
如鏡焉碎石片片皆能照人而質方一丈則重一兩  
昭王春此石爲泥泥通霞之臺與西王母常遊居此

臺上常有衆鸞鳳鼓舞如琴瑟和鳴神光照耀如日月之出臺左右種恒春之樹葉如蓮花芬芳如桂花隨四時之色昭王之末仙人貢焉列國咸賀王曰寡人得恒春矣何憂太清不至恒春一名沉生如今之沉香也有草名濡姦葉色如紺莖色如漆細軟可縈海人織以爲席薦卷之不盈一手舒之則列坐方國之賓莎蘿爲經莎蘿草細大如髮一莖百尋柔軟香滑羣仙以爲龍骨之轡有池方百里水淺可涉泥色若金而味辛以泥爲噐可作舟矣百鍊可爲金色青

照鬼魅猶如石鏡魑魅不能藏形矣

瀛州

瀛洲一名薨洲亦曰環洲東有淵洞有魚長千丈色斑鼻端有角時鼓舞羣戲遠望水間有五色雲就視乃此魚噴水爲雲如慶雲之麗無以加也有樹名影木日中視之如列星萬歲一實實如瓜青皮黑瓤食之骨輕上如華蓋羣仙以避風雨有金巒之觀飾以衆環直上干雲中有青瑤丸覆以雲紈之素刻碧玉爲倒龍之狀懸火精爲月刻黑玉爲鳥以水精爲月

青瑤爲蟾兎於地下爲機候以測昏明不虧弦望時  
時有香風泠然而至張袖受之則歷年不歇有獸名  
嗅石其狀如麒麟不食生卉不飲濁水嗅石則知有  
金玉吹石則開金沙寶璞粲然而可用有草名芸苗  
狀如菖蒲食葉則醉餌根則醒有鳥如鳳身紺翼丹  
名曰藏珠每鳴翔而吐珠累斛仙人常以其珠飾仙  
裳蓋輕而耀於日月也

負嶠山

負嶠山一名環丘上有方湖周廻千里多大鵲高一



丈銜不周之粟粟穗高三丈粒皎如玉鵲銜粟飛於  
中國故世俗間徃徃有之其粟食之歷月不飢故呂  
氏春秋云粟之美者有不周之粟焉東有雲石廣五  
百里駁駱如錦扣之片片則蒼然雲出有木名猗桑  
煎樵以爲蜜有冰蠶長七寸黑色有角有鱗以霜雪  
覆之然後作鬘長一尺其色五彩織爲文錦入水不  
濡以之投火經宿不燎唐堯之世海人獻之堯以爲  
黼黻西有星池千里池中有神龜八足六眼背負七  
星日月八方之圖腹有五岳四瀆之象時出石上望

之煌煌如列星矣有草名芸蓬色白如雪一枝二丈  
夜視有白光可以爲杖南有移池國人長三尺壽萬  
歲以茅爲衣服皆長裾大袖因風以昇煙霞若鳥用  
羽毛也人皆雙瞳脩眉長耳食九天之正氣死而復  
生於億劫之內見五岳再成塵扶桑萬歲一枯其人  
視之如旦暮也北有浣腸之國甜水繞之味甜如蜜  
而水強流迅急千鈞投之久久乃沒其國人常行於  
水上逍遙於絕岳之嶺度天下廣狹繞八柱爲一息  
經四軸而暫寢拾塵吐霧以筭歷劫之數而成丘阜

亦不盡也

### 岱輿山

岱輿山有負淵千里常沸騰以金石投之則爛如土  
矣孟冬水涸中有黃烟從地出起數丈煙色萬變山  
人掘之入數尺得焦石如炭滅有碎火以蒸燭投之  
則然而青色深掘則火轉盛有草名莽煌葉圓如荷  
去之十步炙人衣則焦刈之爲席方冬彌温以枝相  
摩則火出矣南有平沙千里色如金若粉屑靡靡常  
流鳥獸行則沒足風吹沙起若霧亦名金霧亦曰金

塵沙著樹粲然如黃金塗矣和之以泥塗仙宮則晁  
昱明粲也西有玉山其石五色而輕或似履舄之  
狀光澤可愛有類人工其黑色者爲勝衆仙所用焉  
北有玉梁千丈駕玄流之上紫苔覆漫味甘而柔滑  
食者千歲不飢王梁之側有斑斕自然雲霞龍鳳之  
狀梁去玄流千餘丈雲氣生其下傍有丹桂紫桂白  
桂皆直上百尋可爲舟航謂之文桂之舟亦有沙棠  
豫章之木長千尋細枝爲舟猶長十丈有七色芝生  
梁下其色青光輝耀謂之蒼芝螢火大如蜂聲如雀

八翅六足梁有五色蝙蝠黃者無腸倒飛腹向天白者腦重頭垂自挂黑者如鳥至千歲形變如小燕青者毫毛長二寸色如翠赤者止於石穴穴上天視日出入恒在其上有獸名嗽月形似豹飲金泉之液食銀石之髓此獸夜噴白氣其光如月可照數十畝軒轅之世獲焉有遙香草其花如丹光耀入月葉細長而白如忘憂之草其花葉俱香扇馥數里故名遙香草其子如薏中實甘香食之累月不飢渴體如草之香久食延齡萬歲仙人常採食之

昆吾山

昆吾山其下多赤金色如火昔黃帝伐蚩尤陳兵於此地掘深百丈猶未及泉惟見火光如星地中多丹鍊石爲銅銅色青而利泉色赤山草木皆劔利土亦鋼而精至越王勾踐使工人以白馬白牛祠昆吾之神採金鑄之以成八劔之精一名揜日以之指日則光晝暗金陰也陰盛則陽滅二名斷水以之劃水開卽不合三名轉魄以之指月蟾兔爲之倒轉四名懸翦飛鳥遊過觸其刃如斬截焉五名驚鯢以之泛海

鯨鯢爲之深入六日滅魂挾之夜行不逢魑魅七名  
卻邪有妖魅者見之則伏八名真剛以切玉斷金如  
削土木矣以應八方之氣鑄之也其山有獸大如兔  
毛色如金食土下之丹石深穴地以爲窟亦食銅鐵  
膽腎皆如鐵其雌者色白如銀昔吳國武庫之中兵  
刃鐵器俱被食盡而封署依然王令檢其庫穴獵得  
雙兔一白一黃殺之開其腹而有鐵膽腎方知兵刃  
之鐵爲兔所食王乃召其劔工令鑄其膽腎以爲劔  
一雌一雄號干將者雄號鏌鋣者雌其劔可以切玉

斷犀王深寶之遂霸其國後以石匣埋藏及晉之中  
興夜有紫色衝斗牛張華使雷煥爲豐城縣令掘而  
得之華與煥各寶其一拭以華陰之土光耀射人後  
華遇害夫劍所在煥子佩其一劍過延平津劍鳴飛  
入水及入水尋之但見雙龍纏屈於潭下目光如電  
遂不敢前取矣

### 洞庭山

洞庭山浮於水上其下有金堂數百間王女居之四  
時聞金石絲竹之聲徹於山頂楚懷王之時舉羣才



拾遺記 卷十 九  
賦詩於水湄故云瀟湘洞庭之樂聽者令人忘老雖  
咸池九韶不得比焉每四仲之節王常繞山以遊宴  
舉四仲之氣以爲樂章仲春律中夾鍾乃作輕風流  
水之詩醮於山南時中蕤賓乃作皓露秋霜之曲後  
懷王好進姦雄羣賢逃越屈原以忠見斥隱於沅湘  
披蓁茹草混同禽獸不交世務採栢實以和桂膏用  
養心神被王逼逐乃赴清冷之水楚人思慕謂之水  
仙其神遊於天河精靈時降湘浦楚人爲之立祠漢  
末猶在其山又有靈洞入中常如有燭於前中有異

香芬馥泉石明朗採藥石之人入中如行十里迥然  
天清霞耀花芳柳暗丹樓瓊宇宮觀異常乃見衆女  
霓裳冰顏艷質與世人殊別來邀採藥之人飲以瓊  
漿金液延入璇室奏以簫管絲桐餞令還家贈之丹  
醴之訣惟懷慕戀且思其子息卻還洞穴還若燈燭  
導前便絕饑渴而達舊鄉已見邑里人戶各非故鄉  
隣唯尋得九代孫問之云遠祖入洞庭山採藥不還  
今經三百年也其人說於隣里亦失所之

錄曰按禹貢山海正史說名山大澤或不列書圖

著於編雜之部或有乍無或同乍異故使覽者迴  
惑而疑焉至如列子所說負嶠岱輿瑰竒是聚先  
墳莫記蓬萊瀛洲方丈各有別名昆吾神異張騫  
亦云焉覩華戎不同寒暑律人獮禽至其異氣雲  
水草木怪麗殊形考之載籍同其生類非夫貴遠  
體大則笑其虛誕俟諸宏博驗斯靈異焉

王子年拾遺記卷第十終

錢塘郭志學寫

拾遺記後序

晉書藝術傳曰王嘉字子年隴西安陽人也輕舉止醜形貌外若不足內聰慧明敏便滑稽好語笑不食五穀不衣美麗清虛服氣不與世人交遊隱于東陽谷鑿崖穴而居弟子受業者百人亦皆穴處石季龍之末棄其徒衆至長安潛

隱於終南山結庵廬而止門人間而候  
之乃遷於倒獸山堅累徵不赴公侯已  
下咸躬往參詣好尚之士無不師宗之  
問當世事皆隨問而對好為譬喻狀如  
戲調言未然之理辭如讖記當時鮮能  
曉悟之過了皆驗堅將南征遣使者問  
之嘉曰金剛火強乃乘使者馬正衣冠

徐徐東行百步而策馬馳返脫衣服棄  
冠履而歸下馬踞床一無所言使者還  
以告堅不悟復遣問之曰吾世祚云何  
曰未央咸以為吉明年癸未敗于淮南  
所謂未年而有殃也人候之者至心則  
見之不至心則隱形不見衣服在架履  
杖猶在地或取其衣者終不及企而取

之衣架踰高而屋亦不大履杖之物亦如之及姚萇之入長安禮嘉如符堅故事適以自隨每事咨之萇旣與符堅相持問嘉曰吾得殺符堅定天下否嘉曰略得之萇怒曰得當云得何略之有遂斬之先釋道安疾殛使謂嘉曰世故方殷可以同行矣嘉曰師先行吾負債於

人未果去得俄然道安亡而嘉戮可謂  
負債乎符登聞嘉死設壇哭之贈太師  
謚文定公及姚萇死其子興字子略方  
殺堅以定天下略得之謂也嘉死之日  
人有壘上見之其所造三章歌讖事過  
皆驗累世又傳之又著拾遺記十卷其  
事多詭怪今行於世





王子年拾遺記十卷上遡羲農下沿典  
午旁及海外瑰奇詭異之說無不具載  
蕭綺復節爲之錄搜抉典墳符證秘隱  
詞藻燦然予因刻置家塾或有訝其怪  
誕無稽者噫邵伯溫有云四海九州之  
外何物不有特人耳目未及輒謂之妄

矧邃古之事何可必其爲無耶博洽者  
固將有取矣

嘉靖甲午春三月東滄居士吳郡顧春  
識

通占大象歷  
星經二卷



通占大象曆星經卷上

漢 甘公石申著

明 新安程榮校


原缺文一張

四輔




四輔四星抱北極樞星主君臣禮儀主政萬機輔弼  
佐理萬邦之象輔佐北辰而出入授政也

六甲



六甲六星在華蓋之下扛星之旁主分陰陽而配於節候出入故在帝座旁所布政教而授農時也

鉤陳



鉤陳六星在五帝下為後宮大帝正妃又主天子六軍將軍文主三公若星暗人主凶惡之象矣

天皇

天皇大帝一星在鉤陳中央也不記數皆是一星在五帝前坐萬神輔錄圖也其神曰耀魄寶主御羣靈

也

柱下。

柱下史在北辰東主左右史記過事也

尚書




五尚書在東南維主納言夙夜諮謀事也

內厨。

內厨二星在西北角主六宮飲食后妃第宴飲厨府也




天床



天床六星在宮門外聽政之前亦主寢宴會讌息床  
星傾天子不安失位也訣曰火入紫微宮中天下大  
亂帝王失位

北斗




北斗星謂之七政天之諸侯亦爲帝車魁四星爲璇  
璣杓二星爲玉衡齊七政斗爲人君號令之主出號

施令布政天中臨制四方第一名天樞爲土星主陽  
德亦曰政星也是太子像星暗亦經七日則大災第  
二名璇主金刑陰女主之位主月及法若星暗經六  
日則月蝕第三名璣主木及禍亦名金星若天子不  
愛百姓則暗也第四名權主火爲伐爲天理伐也無  
道天子施令不依四時則暗第五名衡主水爲煞助  
四時旁煞有罪天子樂淫則暗第六名闔陽主木及  
天下倉庫五穀第七名瑤光主金亦爲應星訣曰王  
有德至天則斗齊明國昌總暗則國有災起也右斗


中子星少則人多姪亂法令不行木星守貴人繁天下亂也火星守兵起人主災人不聊生棄宅走奔諸邑守斗西大饑人相食守斗南五果不成五星入斗中國易政又易主大亂也彗孛入斗中天下改主有大戮先舉兵者咎後舉兵者昌其國主大災甚於彗之禍右旁守之咎重細審之所守樞入張一度去北辰十八度也衡去極十五度去辰十一度

華蓋




華蓋十六星星在五帝座上正吉帝道昌星傾邪大凶扛九星爲華蓋之柄也上七星爲庶子之官若星明匡主天下不明主亂期八年國無主也

五帝座




五帝內座在華蓋下覆帝座也五帝同座也上色政吉色變爲災凶也

御女



御女四星在鈎陳北主天子八十一御女妃也后之  
官明吉暗凶也

天柱



天柱五星在紫微宮內近東垣主建教等二十四氣  
也

女史。

女史一星在天柱下史北掌記禁中傳漏動靜主時  
要事也

陰德

陰德二星以太陰在尚書西主天下綱紀陰德遺周給惠賑財之事

大理

大理二星在宮門內主刑獄事也自北極已下五十星並在紫微宮內外占曰彗孛入中宮有異姓王火星入守北極臣下煞君木星入守北極國有大衰若分守久有逆臣反亂土星犯乘之大人當之太子有罪五星聚在中宮改立帝王五星及客犯守鉤陳者

大臣凶所守犯之座皆受其殃咎也

輔星


輔星像親近大臣輔佐興而相明若明大如斗者則相奪政兵起若暗小則苑免官若近斗一二寸爲臣迫脅主若五六寸四遠客及彗孛入斗中諸侯爭權逼天子月暈斗大水入城兵起主有赦北斗第六七損角第四五六指南第一二指觜二十有九星

內階



內階六星在文昌北階爲明堂頭

文昌



文昌七星如半月形在北斗魁前天府主營計天下事其六星各有名六司法大理色黃光潤則天下安萬物成青黑及細微多所殘害搖動移處三公被誅不然皇后崩文昌與三公攝提軒轅共爲一體通占木土星守之天下安火星守國亂兵起金星守兵大起若彗孛流星入之大將返叛亂也




三公



三公星三在斗柄東和陰陽齊七政以教天下人  
一星亡天下危二星亡天下亂三星亡天下不治也

天棓




天棓五星不用明明則天下兵起斧鉞用鎗棓八星  
皆非常也入氐一度去北辰二十八度

天槍




天槍三星在北斗柄東主天鋒武備在紫微宮右以  
御也

傳舍



傳舍九星在華蓋奚仲北近天河主賓客之館客星  
守之丘起今四方館也

天廚



天廚六星在紫微宮東北維近傳舍北百官廚今光  
祿廚像之星亡君子賣衣民人賣妻子大饑客守之  
大饑荒

天一。

天一星在紫微宮門外右曰南爲天帝之神主戰鬪  
知吉凶星明吉暗凶若離本位而乘斗後九十日必  
兵大起也光明陰陽和也萬物盛天子吉星亡天下  
亂大凶也

太一。

太一星在天一南半度天帝神主十六神知風雨水  
旱兵馬饑饉疾病災害若在其國也星明吉暗凶離  
本位而乘斗者九十日必兵大起也太一星入軫十

度去北辰十五度半太一星去北辰十一度

天牢



天牢六星在北斗魁下貴人牢占爲貫索同主禁思  
慕姦志火星守入之人民相食之應有赦也

東方七宿三十三星七十五度并中外宮輔座等

角宿




角二星爲天門壽星金星春夏爲火秋冬爲水蒼龍  
角也東方首宿南左角名天津蒼色爲列宿之長北

右角爲天門黃色中間名天關左主天田右主天祇  
十三度八月日在北南去北辰九十一度凡日月五  
星皆從天關行此爲黃道入黃道爲旱其角南二度  
爲太陽道入陰道爲水角宿北二度爲陰道角宿直  
指辰即是耕種次爲農官若明大王道太平若暗及  
亡角搖動王者失政星微小國弱失政王道不行春  
日月入角暈者王失政日月角中蝕者其邦不寧木  
星守七日有赦忠臣用火星守忠臣賢相受誅繒帛  
貴有鬪戰萬人兵起期以日宮中盜賊內亂火守角

宮道不通大環遶鉤已者國大饑火犯之必戰火守  
左角太尉死國危守右角五穀不熟大水災犯左右  
角羣臣謀戰不成伏誅土守內主喜六十日國有忿  
爭金守天下兵大盛國有爭事金火合守太白居後  
被軍將殺水守王者刑罰惡有水災疾疫客孽孛入  
角色白者國有兵起及大喪亦軍敗城堦客守四十  
五日旱五穀焦風雨不時蝗蟲起星流出角門天子  
發使出外從他宿入角門外國使入中京或爲近臣  
殺主戰死月蝕彗或有亂臣在宮非賊而盜月入天


星經 卷一  
市及河而量三重丘起天下道斷軍將失利

天理



天理四星在北斗杓中主貴人牢為執法官星不欲  
明明則貴人被罪

執法



執法四星在太陽首西北主刑獄之人又為刑政之  
官助宣王命內常侍官也

太陽。

太陽守在西北主大臣將備天下不虞事星明吉暗凶星移天下兵起中國不安之應也入張十三度北極四十五度

相。

相星在北極斗南總領百司掌邦教以佐帝主安撫國家集衆事家宰之佐星明吉暗凶亡相死不然流出太陽入張十三度去北辰四十五度相入翼一度去北辰三十一度



平道

平道二星在角間主路道之官

進賢

進賢一星在平道西坦卿相薦舉逸士學官等之職也  
也星明賢士用進暗小人用

天門


天門二星在左角南主天門侍晏應對之所

天田

天田二星在角北主天子畿內地左對壇界城邑邊


塞

周鼎



周鼎三星足狀云鼎足星在攝提大角西主神鼎


庫樓




庫樓星二十九星庫樓十五柱十五星衡四星在角南軫東南次器府東一曰文陣兵車之府中繁衆則

大兵起庫中無星下臣逆謀兵盡出天下無災居者  
庫中柱動出兵戈四夷狄柱半不具天子自將半兵  
出木星守人饑米貴西入軫一度去北辰四十九度  
昏中西去北辰八十九度

左攝提



右攝提



攝提六星在角九東北主九卿爲甲兵携紀綱建時  
節祥火星守天下更主金星守兵起

大角。


大角一星天棟在攝提中主帝座金星守兵大起月  
蝕王者惡忌之入亢二度半去北辰五十九度也

帝席




帝席三星在大角北星暗天下安星不欲明明則王  
公凶

亢池



亢池六星在亢北主度送迎之事

折威



折威七星在亢南主詔獄斬殺邊將死事

陽門



陽門二星在庫樓東北隘塞外寇盜之事

陣車



陣車三星在氏南主革車兵車


亢宿



亢四星名天府一名天庭總領四海名火星春夏水  
秋冬金暗國內亂弱大明天下安寧日月蝕亢中國  
有事五星犯亢逆行君憂失國大臣不用木星守留  
三十日已上有赦年豐久守其國米貴人多疾病水  
災木與火星同穀不成人死如草木水災火星守多  
雨天下兵盡返大起水星守其分米貴久守多病大  
水災也土星守萬物不成多病金星守天下道不通  
兵起盜賊水災傷人金星行入南上道五穀傷赤色  
旱人流走彗孛犯之其國兵起大臣作亂一年月暈


圍光士卒自將百里不遂士卒死

梗河



梗河三星梗在大角帝座北主天子鋒又主胡兵及  
喪訣曰梗河去也相去吉相向兵起客守世亂矣

騎官



騎官二十七星在昴南主天子騎虎貴貴諸侯之族  
子弟宿衛天子今三衛之像星衆天下安星少兵起  
五星守之兵起西北入北辰一百十五度


車騎將軍。

車騎將軍星在騎官東南主車騎將軍之官

車騎

車騎三星在騎官南總領車騎行軍之事


西咸





西咸四星在氐東主治滯佚南星入氐五度去北辰  
九十三度

七公




七公七星在招搖東氐北爲天相主三公七政善惡  
星明則衆議詳審星入河中米貴人相食金星守天  
下兵起亂西星入氐四度去北辰四十九度

積卒



前下積卒星十二在氐東南星微小吉如大明及搖  
動主朝廷有兵微小吉一星亡兵半出二星亡兵大  
半出三星亡兵盡出五星守兵起星西入氐十三度  
去北辰一百二十四度

房宿



房四星名天府管四方一名天旗二名天駟三名天  
龍四名天馬五名天衡六爲明堂是火星春夏水秋  
冬火房爲四表表三道日月五星常道也上第一星

名爲右服次將其名陽環上道二星名右驂上相其名中道三名左服次將其名下道四名左驂上相總四輔左驂左服云東方及南方可用兵右驂右服云西方北方不可用兵

玄戈。

玄戈一星在招搖北一名臣戈五星守丘起星明動胡兵起入氐一度去北辰四十二度

招搖。

招搖星在梗河北主胡兵起角動丘葦起行入氐二

度去北辰四十一度

顓頊



顓頊二星在折威東南主治獄官拷囚憎杖察真僞也

氐宿



氐四星爲天宿宮一名天根二名天符木星春夏木  
秋冬水主皇后妃嬪前二大星正妃後二左右大明  
爲臣奉事君寧暗失臣勢動臣出國日月氐中君犯

星經 卷一 十一  
惡之木星守之后喜守二十日有王者之所行不利  
疾則治遲行臣職主守必有諸侯並王火守大臣相  
譖逆行而赤色大臣亡久守六十日有大赦火星入  
之有賊臣爲亂近期一年遠二年金星守者有兵起  
將軍有封爵者火之位水守有大水漂浸宮館萬物  
不成水入貴臣憂有獄事客守布帛貴土星守有立  
太子久守八十日已上國有兵起彗孛行入氏中後  
宮有異兵動不出一百八日內遭水東平月暈圓氏  
大將軍殃人多疾病

鉤鈐

鉤鈐二星主法去房宿七寸第一名天健二名天官  
齋開藏若近夫妻同心遠者夫妻不和大明則羣臣  
奉職天下道洽暗則羣臣亂政王道不行日月蝕房  
中王者亂昏大臣專權木星守天下和平留四十日  
五穀豐人安吉無疾病天子有令德期在四月火星  
守有兵起七月有大喪及赦十日守大夫災二十日  
不去必臣反及君子天子憂亂王者惡之天子兵旱  
守止一日大臣亂土星守有妾王亦亂旱及地動久

守其有兵金守陪脇君大有土功事國亂布帛貴久  
守人饑易主火守姦臣謀主大臣相譖暴誅臣佐天  
下垂離若出房心中間地動客守米貴十倍日月五  
星犯之色青國憂兵喪色白大兵相殺積尸如丘彗  
孛入房國危人亂相殘流星入房西行爲枉矢主殺  
忠臣臣殺主輔臣亡遠期三年常以三月候房日月  
出表南大旱喪出表北災及萬里兵亂陰雨若出中  
道太平許徐潁州月暈圍房心災疫凶五度九月日  
此上去北辰一百四度半

罰



罰三星在東咸西下西北而列主受金罰贖市布租也

東咸



東咸四星在房東北主防淫佚木在北守而搖動天子淫佚過度星南入心二度去北辰一百三度也後則不過百八十日遠則不過三年起於宋汴等州

天乳



天乳星在氐北主甘露十五度十二中西南星去北  
辰九十六度北件屬前項天乳別

貫索



貫索星九在七公前爲賊人牢牢口一星爲門門欲  
開開則有赦若赦主人憂若牢門閉及口星入牢中  
有自絞死者以五子日夜候之一星亡有喜事二星  
亡有爵事三星亡有赦甲庚期八十日丙辛期七十  
日戊壬期六十日星入河中人相食若九星總見獄  
事煩水星守水災火星守米貴有大星出牢大赦小

星卽小曲恩降慮口舌右星入尾一度去北辰五十  
五度也

巫官



巫官二星在房西南主醫巫之職事也

天福



天福三星在房西主鑾駕乘輿之官也

鍵閉



鍵閉星在房東北主管禽星不欲明明則內亂門扉  
不禁姦淫至行於女也

心宿



心三星中天主前爲太子後爲庶子火星也春夏木  
秋冬水一名大火二名大辰三名鶉火中星明大赤  
爲照天子德行暗小失常色爲主微弱不能自斷星  
不欲直直則主失計動搖天子憂木星守天下安久  
守而絕犯者臣謀主大兵起火星守地動守二十日  
臣謀主色黑主崩之像土守聖帝出謀臣天下太平  
有云國有赦久守不去憂賊天下大旱有金星守山  
崩四方兵起久守二十日已上去心三寸兵起鉤戰



天市垣五十六星在房心北主權衡一名天旗大明  
則米貴市中星衆則歲實五星入市門則兵起芒角  
色赤赤氣入大災火守米貴所守坐犯皆當之門左  
星入尾一度去北辰九十四度也

候

候星在市東主輔臣陰陽法官明則輔臣強小暗輔  
微弱入箕二度去北辰七十二度

宦官



宦官四星在帝座西南侍帝之傍入尾十二度

斗



斗五星在宮星西南主稱量度明斗西後則豐若斗  
亡仰不熟入尾十度

宗人



宗人四星在宗政東主司享先人星動帝親致憂

宗正



宗正二星在帝座東南主宗正卿大夫暗室位室族

有事

通占大象曆星經卷上終

通占大象曆星經卷下

漢 甘公石申著


明 新安程榮校

屠肆



屠肆二星在帛度北主屠煞之位也

市樓



市樓六星在市門中主闐闐之司今市曹官之職

斛





斛四星在北斗南主斛食之事已上諸星並在中也

女床



女床三星在天紀北主後宮生女事侍帝及皇后明則宮人自恣入箕一度去北辰五十三度

帝座。

帝座一星在市中神農所貴色明潤天子威令行徵小凶亡大惡之入尾十五度去北辰七十一度

宗星



宗二星在候東主宗室爲帝血脈之臣錄呈家親族  
等級星明則族人有序暗則族有憂

列肆



列肆二星在斛西北主貨珍寶金玉等也

東肆




東肆二星在宮門門垣左星之西主市易價直之官

帛度




帛度二星在宗星東北主平量也

天紀



天紀九星在貫索東主九卿萬事綱紀掌理然訟與貫相連有索卽地動期二年星不欲明卽天下有怨恨生亡則國政壞西入尾五度去北辰五十一度

天棒




天棒五星在女床東北主忿爭刑罰以禦王難備非常明大有憂微小吉不用明火星守兵起入箕八度去北辰十二度春夏火秋冬水主八風之始一名析木

天維




天維三星在尾北斗杓後若星散則天下不微名也

天江



天江四星在尾北主太陰明動大水不禁兵起不具  
天下津梁不通南星入尾六度去北辰一百十一度

天龜



天龜六星在尾南漢中主卜吉凶明君臣若火星守


旱澇災入尾十二度去北辰一百四十一度

天魚。

天魚一星在尾河中主雲雨理陰陽明河海出天魚  
搖暴水災火星守南旱北水

神宮

尾宿




龍尾九星爲後宮第一星后次三夫人次九嬪次嬪  
妾一名后族水星也二風后三天鷄四天狗五太廟  
皆欲明大小相承則宮多子孫傳說曰一星在第二

東二寸小者是長其星明則輔臣忠政暗則陪臣亂  
邦木星守立太子三十日必后族逆兵妾賣權臣亂  
國火星守兵相向大臣憂火興水合守箕尾間名九  
江口必有赦若勝踊折絕者天下亂及旱災土星守  
多盜賊旱宮有廢黜土入魚鹽貴兵起大將出征土  
火星金守准上合星入守人亂大臣變易失政水守  
入天下水災江河決魚米貴客守賊暴貴客入天下  
大饑荒亂人相食疾疫死竄他方不耕織君子貨衣  
小人賣妻子日月蝕於尾貴臣中相刑及暈虹蜺背

何尾將相憂亂后有喪彗孛行犯貴臣誅內寵亂政  
幽州定冀遼東等之應也

箕宿



箕四星主後別府二十七世婦八十一御女爲相天  
子后也亦爲天漢九江口主梁在漢邊金星春夏金  
秋冬土箕后動有風期三日也前二星爲后也箕入  
河中大饑人相食箕前亦名糠星大明歲豐小微天  
下饑荒天下無米木守宮有口舌火星守天下饑久

守環遶成鉤已大臣被誅火守大水災平溢澤若十月守之大水米倍饑土水二星守萬物不成饑久守兵起或米貴或赦金星入守兵起有赦更主久守風旱防內亂兵起攻政水星守穀不豐入大人憂客守天下大饑米貴十倍人相食流亡他邑不耕織色赤大風雨亂客在南旱計日月五星入之中天下兵起滄洲洛陽玄兔廣陵等應之也

建星





建六星在南斗北天之都開三光道也主司七耀行  
 得失十一月甲子冬至大應治政之宿所起也木星  
 守水災米貴多病金星守萬物不成久惡等守惡水  
 星守人饑恹星入斗七度去北辰一百十三度

天弁




天弁九星在建近河為市宮之長暗凶無萬物明大  
 萬物興眾主市易也

狗




狗二星在斗魁前主卿臣移處卿臣爲亂

狗國



狗國四星在建東南主鮮卑烏丸明邊兵起也


天籥



天籥七星在斗杓第二星西主關籥開閉明吉暗凶


災

鰲




天鰲十五星在斗南主太陰水蟲不在漢中有水火  
 災白衣食星大人喪火守旱水星即水災右入斗一  
 度去北辰一百二十七度

漸臺




漸臺四星屬織女東足主晷漏律呂陰陽事

輦道



輦道五星屬織女西足主天子遊宮嬉樂之道也

杵



杵三星在箕南主杵曰春米事星動人失釜甑修田  
橫大饑荒守之天下饑北星入箕一度去北辰一百  
四十三度

農



農丈人一星在斗南主農官正政司農卿等之職  
北方七宿三十五星九十八度七十五分五十秒


斗宿



南斗六星主天子壽命亦云宰相爵祿之位巫咸氏  
云木星春夏木秋冬水一名天斧二名天闕三名天  
機大明王道和平將相同心帝命壽天下安暗大臣  
失位天下驚芒角動搖國失忠臣天下愁木守六十  
日大臣增壽爵祿木逆行入魁中大臣逆久守兵起  
水災大饑人相食火守國有內變相輔不安兵起火  
逆行順守者及遶城鉤已將相崩死國災火久守國  
絕嗣土星守入斗中有王者不用兵昇大位守之九  
十日兵起水災金星守執法大臣作逆國亂兵起有


赦火星金俱入斗中名曰鑠必有臣子逆久留遲火  
經過速出者禍難速平水星守水災火入斗兵起於  
吳越人大饑守客有兵絕道卒有大水賊盜多亂喪  
弟攻兄子殺父或主崩米貴久守國絕嗣客守第二  
星大水人相食客赤色入斗中兵起軍將死日月入  
斗大臣失位或被戮若斗中蝕者日帝惡月后惡暈  
圍斗之人流千里江池丹楊越廬洪地等應也

天泉



天泉十星在龍東一曰大海主灌溉溝渠之事也

織女



織女三星在天市東織天女主蒹果絲帛收藏珍寶  
及女變明大天下平和常以七月一月六七日見東  
方色赤精明女功善一星主兵起女人為役常向扶  
匡即善不向則絲帛倍貴火星守布帛貴兵起十年  
乃息公主憂客守絲帛等貴入二十七去北辰五十  
二度也

牽牛




牽牛六星主關梁工異主大路中主牛木星春夏木  
秋冬火中央火星爲政始日月五星行起於此皆携  
星遠漢天下牛貴明亦貴暗小賊入漢中并役死直  
米穀價平曲米貴失常色牛多死穀不成木星守天  
下和平久守水災人凍死米貴賣子虎害人臣謀主  
木逆 守有水道不通火星守老臣逆牛貴十倍人  
相食兵起將軍死大水災津梁不通土星守臣謀主  
君有失位臣金星守地氣泄兵起至城天下人多死  
水守辰星常以冬朝牽牛若不朝來年五穀不熟大



水損害客守二十日兵起彗孛行牛中吳越有自王者彗出牛中七十日有政更像虹蜺出牛必有壞城臨淮月暈圍牛損小兒災變也八度八月昏中氏中去北辰一百十度

扶匡



扶匡七星在天柱東主桑蠶之事


天雞



天雞二星在狗國北主異鳥火星守兵起土守人饑


相食流亡

河鼓




河鼓三星中大星爲大將軍左星爲左將軍右星爲右將軍星直吉爲羽軍幹能曲卽凶爲失計奪勢左右旗各九星並在牛北枕河主軍鼓達者聲音設守險以旗表亡動兵起左旗黑色主陰幽之處備警急之事河鼓有芒角爲將軍雄強百盛也

天浮



天浮四星在左旗南北列主漏刻天鼓若暗漏刻失  
時明則得所吉

九坎




九坎九星在牛南立溝渠水泉流通明災起暗吉五  
星守及犯之水泛溢西入斗四度去北辰一百二十  
六度

天田




天田九星在牛東南主畿內田苗之職

羅堰



羅堰二星在牛東星不明暗吉大明馬被水淹浸


女宿



須女四星主布帛為珍寶藏一名婺女天女水星春  
夏水秋冬火大明女功有就天下甚熟小暗天下不  
足庫藏空虛日月蝕女中天下女功不為邦憂患木


星守歲多水有喜女主人多凍死火星守產婦多死  
布帛貴蒙土星守人相嫉惡有錢人暴貴存女喪金  
星守臣下謀主兵起人多死女多寡府藏出珍帛水  
星守有水災萬物不成布帛貴客守諸侯進妓女布  
絹貴有女暴貴慧孛孛行犯國兵起女亂常海西郡婺  
州台州等月軍國主女死也十二月日在此二月日  
中西星去北辰一百六度

離珠



離珠五星在女北主藏府以御後宮移則亂西入女  
一度去北辰九十四度也

瓜瓠



瓜瓠五星在離珠北敗瓜五瓜南星明大孰主陰謀  
後宮天子果園星不具搖動有賊害人木水客星等  
守魚鹽貴瓜瓠入女一度去北辰七十一度

璿瑜



星經 卷下  
瑠瑜三星在秦代東南列北主王饑衣服

虛宿

虛二星主廟堂哭泣金星春夏水秋冬金一名玄枵  
二名顓頊三名大卿亦臨官星欹枕斜上下不比則  
嚮祀失禮木星守昭穆失序人饑多病木星與土合  
守名陰陽盡爲大水災魚行人道民流亡不居其處  
期三年當大旱赤地千里火星守赤地千里女子多  
死萬物不成有土功役天子之兵久守人饑米貴十  
倍土守風雨不時大旱多風米貴金星守臣謀王國

政惡兵起殺人流血水星守旱萬物不成其客守其  
分有災疫若凌犯環遶鉤已國亂彗孛行犯久有兵  
入相殺流血如川屍如丘大星如半月守名天賊為  
帝主者奉郊廟以銷災齊州日圍虛兵動人饑

越。

越一星在婺女之南

鄭。

鄭一星在越星南

趙。



趙二星在鄭之南

齊

齊二星在越星南

周

周二星在越星東

楚

楚二星在魏星南

燕

燕一星在楚星南

秦



秦二星在周星東南

魏



魏二星在韓星北

韓



韓一星在正星北

晉



晉一星在代星北

代



代二星在秦星南

右件星色黑變動流亡五星凌犯則其國各當死也


司非 司危 司祿 司命



司命司祿司危司非各二星已上在虛北司祿次司命北司危次司祿北司非次司危北

右各主天下壽命爵祿安泰危敗是非之事

天津



天津九星在虛北河中主津瀆津梁知窮危通濟度  
之官星明動兵起參差米貴星大津不通三河水爲  
害星移河溢覆赤氣入之旱災黃白氣入天子有令  
德火星守天下大亂及旱西入牛二度去北辰四十  
九度也

危宿



危三星主宮室祭祀土星春夏水秋冬火動而暗天  
子宮室土功事興


墳



墳墓四星在危下主山陵悲慘事暗失本位小不見  
則山陵毀梓宮剝割事也日月蝕危中主宮殿崩陷  
大臣殺逆天下作木星守祀不敬天子別造宮室土  
火守人多役死不葬歲儉南方有兵久守東大兵逆  
國敗政人饑旱米貴十倍土星守土功起旱損急兵  
金星守罷兵將軍喜慶水星守臣下亂謀敗破被刑  
法官有憂國有水災日月五星入天下亂來年大饑  
客守國政主王侯事米貴彗孛行犯國返兵起流星  
入天下不安近半年遠三年蔡州太原郡月暈圍色

人多病

室宿




營室二星主軍糧離宮上六星主隱藏木星春夏火  
 秋冬水一名宮二名室明國昌動搖兵出起日蝕室  
 中王自將出征不伏月蝕歲饑百姓絕種上六星名  
 離宮主六宮妃后位為掖求卷若危乘守入城鉤已  
 環遶左右逆行往來於官者為妃后廢黜或主崩后  
 黨被誅或宮女外通以時占之木星守在南東有善

事北卽憂西米貴火星守將軍凶久守成鉤已者主  
失官位大臣陰謀憂旱米貴十倍大臣作逆守經二  
十日已上至久九十日臣亂殺君篡位天子惡之土  
星守主陰造宮室起土功將軍益封金星守兵革散  
久守軍兵滿野水星守水災民爲主徵敗亡候之不  
出四十客守有軍出失兵法主民得地人米貴人散  
彗孛星出天下亂國易政卒爲績廣政彗孛犯之前  
起兵者爲弱亦不守鬪戰必敗淫衛甘秦州月暈圍  
室壁下人謀成起謀不成婦兒多病死者應之時取

占之應也

奚仲




奚仲四星在天津北帝王東宮之官也

鉤



鉤九星在造父西河中星移主地動之應也

車府





車府七星在天津東近河主官車之府也

哭



哭二星在虛南主死哭之事

泣



泣二星在哭星東已上並主死悲泣之事

造父



造父五星在傳舍南主御女之官則馬貴

蓋屋




蓋屋二星在危宿之南主宮室之事也

虛梁



虛梁四星在危南主國陵寢廟非人居處

天壘




天壘十三星如貫索狀在哭泣之南主北夷丁零匈奴之事也

敗臼




敗曰四星在虛危南主政治如哭泣亡人賣釜饒出  
鄉宅客守人亂西南入女十三度去北辰一百三十  
一度

人星



人五星在危北主天下百姓亡官有詐僞作詔勅之  
人爲婦人凶亂者也

杵臼




杵臼星在人傍主春軍糧曰四星在杵下若杵臼不相當軍事饑曰仰歲熟豐傾覆大饑也

土吏



土吏三星在室西南主備設司過農事

天錢




天錢十星在虛梁南主錢財庫聚天下財物庸調之  
輦司今左右庫藏是也

騰蛇




騰蛇二十三星在室北枕河主水蟲暗國安移南大旱移北大水客守水災頭入室一度去北辰五十度也

天海




天海十星在壁西南五星及客守之水涌溢浸溺人邑

雷電




雷電六星在室西南主興雷電也

雲雨



雲雨四星在雷電東主雨澤萬物成之

霹靂



霹靂五星在雲雨北主天威擊擊萬物

北落



北落師門一星在羽林軍西主候兵星明大而角軍


兵安小暗天下兵五星犯兵起金水木星守尤甚木  
土犯吉火星守人兵羽不可固國殘朝亡入危九度  
去北辰一百二十度

天剛



天剛二星在北落西南主天繩張漫野宿所用也

八魁



八魁九星在北落東南主獸之官五星及客守之兵

起金火星守尤凶甚

鈇鑽



鈇鑽三星在八魁西北一名斧鉞主斬刈亂行誅誑  
詐僞人暗吉移處兵起

壁宿




東壁二星主文章圖書也土星春夏金秋冬土一名  
天術失色大小不同天子將封鄙土而失天下過日  
蝕壁中國不用賢士失文字月蝕中大臣憂文者死



木星守五經任人被用朝廷興火星守大臣謀君歲  
旱不熟米貴不顯內外勝政丘起土星守久賢臣國  
用文章道術興行國君延壽天下豐熟太平火星入  
中街君崩五日則相薨若不死則流散土星守逆行  
入壁萬物不成守經九十日已上大兵起百姓有立  
王者金星守天下不通王者急刑罰有兵大臣憂水  
守水災道不通客守多風雨及水災臣下賊王者政  
刑事內明通明有政事內清月暈壁其久國亂彗孛  
行犯兵起火守火災大廟門天下有兼并者辟明王


道與有君子在位星暗王道衰人得用武蘭涼衛州  
等分也

羽林



羽林軍星四十五星壘辟十二星並在室南主翊衛  
天子之軍入安飛將星欲威明天下安星暗兵盡失  
西入室五度去北辰一百二十三度也

王良



王良五星在奎北河中爲御馬官漢中四星天駟旁  
一星名王良主疾及路爲天橋主惡兵也星不具津  
河不通移向四方隨方有兵起也

策 ○

策一星在王良前爲天子僕策御馬云王良策馬軍  
騎滿野大兵起火守良兵起明則馬賤暗卽馬貴西  
入壁半度去北辰四十二度

土公 ○

土公二星在壁南主營造宮室起土之官等類也

廐



天廐十星在壁北主天子馬坊廐苑之官也

通占大象曆星經卷下終



飛燕外傳



趙飛燕外傳

漢 潞水伶玄著

明 新安程榮校

趙后飛燕父馮萬金祖大力工理樂器事江都王協  
律舍人萬金不肯傳家業編習樂聲亡章曲任爲繁  
手哀聲自號凡靡之樂聞者心動焉江都王孫女姑  
蘇主嫁江都中尉趙曼曼幸萬金食不同器不飽萬  
金得通趙主主有娠曼性暴妬且早有私病不近婦  
人主恐稱疾居王宮一產二女歸之萬金長曰宜主



次曰合德然皆冒姓趙宜主幼聰悟家有彭祖分脈之書善行氣術長而織便輕細舉止翩然人謂之飛燕合德膏滑出浴不濡善音辭輕緩可聽二人皆出世色萬金死馮氏家敗飛燕妹弟流轉至長安於時人稱趙主子或云曼之他子與陽阿主家令趙臨共里巷託附臨屢爲組文刺繡獻臨臨愧受之居臨家稱臨女臨常有女事官省被病歸死飛燕或稱死者飛燕妹弟事陽阿主家爲舍直常竊倣歌舞積思精切聽至終日不得食待直貲服疏苦財且顓事膏沐

澡粉其費亡所愛共直者指爲愚人飛燕通隣羽林  
射鳥者飛燕貧與合德共被夜雪期射鳥者於舍旁  
飛燕露立閉息順氣體温舒亡疹粟射鳥者異之以  
爲神僊飛燕緣主家大人得入宮召幸其姊妹樊嫔  
於計反爲丞光司帝者故識飛燕與射鳥兒事爲之寒  
心及幸飛燕瞑目牢握涕交頤下戰粟不迎帝帝擁  
飛燕三夕不能接畧無譴意宮中素幸者從容問帝  
帝曰豐若有餘柔若無骨遷延謙畏若遠若近禮義  
人也寧與女曹婢脅肩者比邪旣幸流丹浹藉嫔私

語飛燕曰射鳥者不近女邪飛燕曰吾內視三日肉  
肌盈實矣帝體洪壯創我甚焉飛燕自此特幸後宮  
號趙皇后帝居鴛鴦殿便房省帝簿嫔上簿嫔因進  
言飛燕有女弟合德美容體性醇粹可信不與飛燕  
比帝卽令舍人呂延福以百寶鳳毛步輦迎合德合  
德謝曰非貴人姊召不敢行願斬首以報宮中延福  
還奏嫔爲帝取后五采組文手藉爲符以召合德合  
德新沐膏九曲沈水香爲卷髮號新髻爲薄眉號遠  
山黛施小朱號慵來粧衣故短繡裙小袖李文襪帝

御雲光殿帳使樊嬖進合德合德謝曰貴人姊虐妬  
不難滅恩受耻不愛死非姊教願以身易耻不望旋  
踵音詞舒閑清切左右嗟賞之嘖嘖帝乃歸合德宣  
帝時披香博士淖方成白髮教授宮中號淖夫人在  
帝后唾曰此禍水也滅火必矣帝用樊嬖計爲后別  
開遠條館賜紫茸雲氣帳文王几赤金九層博山緣  
合嬖諷后曰上久亡子宮中不思千萬歲計邪何不  
時進上求有子后德嬖計是夜進合德帝大悅以輔  
屬體無所不靡謂爲溫柔卿謂嬖曰吾老是卿矣不

能效武皇帝求白雲卿也。媿呼萬歲賀曰：陛下真得  
仙者。上立賜媿鮫文萬金錦二十四疋，合德尤幸。號  
爲趙媿好媿好事，后常爲兒拜。后與媿好坐，后誤唾  
媿好，媿好曰：姊唾染人，緝衷正似石上華。假令尚  
方爲之，未必能若此。衣之華以爲石華，廣袖后在遠  
條，館多通侍郎宮奴多子者。媿好傾心翊護，常謂帝  
曰：姊性剛，或爲人構陷，則趙氏無種矣。每泣下，悽惻  
以故。白后姦狀者，帝輒殺之。侍郎宮奴鮮絳，蘊香恣  
縱，棲息遠條，館無敢言者。后終無子，后浴五蘊七香。

湯踞通香沉水坐燎降神百蘊香婕妤浴苴薏湯傳  
露華百英粉帝嘗私語樊嫔曰后雖有異香不若婕  
妤體自香也江都易王故姬李陽華其姑爲馮大力  
妻陽華老歸馮氏后姊弟母事陽華陽華善膏飾常  
教后九迴沉水香澤雄麝臍內息肌丸婕妤亦內息  
肌丸常試若爲婦者月事益薄他日后言於承光司  
劑者上官嫵嫵膺曰若如是安能有子乎教后煮美  
花滌之終不能驗真臘夷獻萬年蛤不夜光珠彩皆  
若月照人亡妍醜皆美艷帝以蛤賜后以珠賜婕妤

后以蛤粧五成金霞帳帳中常若滿月久之帝謂婕  
妤曰吾晝視后不若夜眎之美每旦令人忽忽如失  
婕妤聞之卽以珠號爲枕前不夜珠爲后壽終不爲  
后道帝言始加大號婕妤奏書於后曰天地交暢貴  
人姊及此令吉光登正位爲先人休不堪喜豫謹奏  
上二十六物以賀金屑組文茵一鋪沉水香蓮心枕  
一面五色同心大結一盤鴛鴦萬金錦一疋琉璃屏  
風一張枕前不夜珠一枚含香綠毛狸藉一鋪通香  
虎皮檀象一座龍香握魚二首獨搖寶蓮一鋪七出

菱花鏡一奩精金羈環四指若亡絳綃單衣一襲香  
文羅手藉三幅七回光雄肪髮澤一盞紫金被褥香  
爐三枚文犀辟毒箸二雙碧玉膏奩一合使侍兒郭  
語瓊拜上后報以雲錦五色帳沉水香玉壺婕妤泣  
怨帝曰非姊賜我死不知此器帝謝之詔益州留三  
年輸爲婕妤作七成錦帳以沉水香飾婕妤接帝於  
太液池作千人舟號合宮之舟池中起爲瀛洲榭高  
四十尺帝御流波文縠無縫衫后衣南越所貢雲英  
紫裙碧瓊輕綃廣榭上后歌舞歸風送遠之曲帝以



文犀簪擊玉甌令后所愛侍郎馮無方吹笙以倚后  
歌中流歌酣風大起后順風揚音無方長喻細嬾與  
相屬后裙髀曰顧我顧我后揚袖曰仙乎仙乎去故  
而就新寧忘懷乎帝曰無方爲我持后無方捨吹持  
后履久之風霽后泣曰帝恩我使我仙去不待悵然  
曼嘯泣數行下帝益愧愛后賜無方千萬入后房闈  
他日宮姝幸者或襞裙爲絳號曰留仙裙婕妤益貴  
幸號昭儀求近遠條館帝作少嬪館爲露華殿含風  
殿博昌殿求安殿皆爲前殿後殿又爲溫室凝缸室

浴蘭室曲房連檻飾黃金白玉以壁爲表裏千變萬  
狀連遠條館號通仙門后貴寵益思放蕩使人博求  
術士求匪安却老之方時西南北波夷致貢其使者  
舉茹一飯晝夜不卧偃典屬國上其狀屢有光怪后  
聞之問何如術夷人曰吾術天地平生死齊出入有  
無變化萬象而卒不化后令樊嫔弟子不周遺千金  
夷人曰學吾術者要不淫與謾言后遂不報他日樊  
嫔侍后浴語甚謹后爲樊嫔道夷言嫔抵掌笑曰憶  
在江都時陽華李姑畜閨鴨水池上苦獺嚙鴨時下

朱里芮姥者求捕獺狸獻姥謂姑曰是狸不他食當  
飯以鴨姑怒絞其狸今夷術真似此也后大笑曰臭  
夷何足汙吾絞乎后所通宮奴燕赤鳳者雄捷能超  
觀閣兼通昭儀赤鳳始出少嬪館后適來幸時十月  
五日宮中故事上靈安廟是日吹埴擊鼓歌連臂踏  
地歌赤鳳來曲后謂昭儀曰赤鳳爲誰來昭儀曰赤  
鳳自爲姊來寧爲他人乎后怒以杯抵昭儀裙曰鼠  
子能嚙人乎昭儀曰穿其衣見其私足矣安在嚙人  
乎昭儀素卑事后不虞見荅之暴孰視不復言樊姬

脫簪叩頭出血扶昭儀爲拜后昭儀拜乃泣曰姊寧  
忘共被夜長苦寒不成寐使合德雍姊背邪今日垂  
得貴皆勝人且無外搏我姊弟其忍內相搏乎后亦  
泣持昭儀手抽紫玉九鸕釵爲昭儀簪髻乃罷帝微  
聞其事畏后不敢問以問昭儀昭儀曰后妬我尔以  
漢家火德故以帝爲赤龍鳳帝信之大悅帝嘗蚤獵  
觸雪得疾陰緩弱不能壯發每持昭儀足不勝至欲  
輒暴起昭儀常轉側帝不能長持其足樊嬖謂昭儀  
曰上餌方士大丹求盛大不能得得貴人足一持暢

動比天與貴妃大福寧轉側俾帝就邪昭儀曰幸轉側不就尚能留帝欲亦如姊教帝持則厭去矣安能復動乎后驕逸體微病輒不自飲食須帝持匕箸藥有苦口者非帝爲含吐不下咽昭儀夜入浴蘭室膚體光發占燈燭帝從幃中竊望之侍兒以白昭儀昭儀覽巾使徹燭他日帝約賜侍兒黃金使無得言私婢不豫約中出幃值帝卽入白昭儀昭儀遽隱辟自是帝從蘭室幃中窺昭儀多袖金逢侍兒私婢輒牽止賜之侍兒貪帝金一出入不絕帝使夜從帑益

至百餘金帝病緩弱大鑿萬方不能救求竒藥嘗得  
脊卹膠遺昭儀昭儀輒進帝一丸一幸一夕昭儀醉  
進七丸帝昏夜擁昭儀居九成帳笑吃吃不絕抵明  
帝起御衣陰精流輸不禁有頃絕倒裛衣視帝餘精  
出湧霑汗被內須臾帝崩官人以白太后太后使理  
昭儀昭儀曰吾持人主如嬰兒寵傾天下安能斂手  
掖庭令爭帷帳之事乎乃拊膺呼曰帝何往乎遂齧  
血而死



古今  
刀

劒  
錄





古今刀劍錄

并序

梁 丹陽陶弘景著

明 新安程 榮校

夫刀劍之由出已久矣前王後帝莫不鑄之但以小事記注者不甚詳錄遂使精竒挺異空成堙沒慨然有想遂爲記云

夏禹子帝啓在位十年以庚戌八年鑄一銅劍長三尺九寸後藏之秦望山腹上刻二十八宿文有背面向文爲星辰背記山川日月

啓子太康在位二十九年歲在辛卯三月春鑄一銅劍上有八方面長三尺二寸頭方

孔甲在位三十一年以九年歲次甲辰秣牛首山鐵鑄一劍銘曰夾古文篆書長四尺一寸

殷太甲在位三十二年以四年歲次甲子鑄一劍長二尺文曰定光古文篆書

武丁在位五十九年以元年歲次戊午鑄一劍長三尺銘曰照膽古文篆書

周昭王瑕在位五十一年以二年歲次壬午鑄五劍

各投五嶽銘曰鎮嶽尚方古文篆書長五尺

簡王夷在位十四年以元年歲次癸酉鑄一劍長三尺銘曰駿大篆書

秦昭王稷在位五十二年以元年歲次丙午鑄一劍長三尺銘曰誠大篆書

秦始皇在位三十七年以三年歲次丁巳採北祗銅鑄二劍銘曰定秦小篆書李斯刻埋在阿房宮閣下一在觀臺下長三尺六寸

前漢劉季在位十二年以始皇三十四年於南山得

一鐵劔長三尺銘曰赤霄大篆書及貴常服之此卽  
斬蛇劔也

文帝恒在位二十三年以初元十六年歲次庚午鑄  
三劔長三尺六寸銘曰神龜多刻龜刑以應大橫之  
兆帝崩命入玄武宮

武帝徹在位五十四年以元光五年歲次乙巳鑄八  
劔長三尺六寸銘曰八服小篆書高恒霍華太山五  
嶽皆埋之

宣帝詢在位二十五年以本始四年鑄二劔長三尺

一曰毛二曰貴以足下有毛故爲之皆小篆書

平帝衍在位五年以元始元年歲次辛酉掘得一劍  
上有帝名因服之大篆書

王莽在僞位十七年以建國五年歲次庚午造威斗  
及神劍皆練五色石爲之銘曰神勝萬里伏小篆書  
長三尺六寸

更始劉聖公在僞位二年自造一劍銘曰更國小篆  
書

後漢光武秀在位三十三年未貴時在南陽鄂山得

一劔文曰秀霸小篆書帝常服之

明帝莊在位十八年以永平元年歲次戊午鑄一劔上作龍形沉之於洛水中水清時常有見之者

章帝烜在位十三年以建初八年鑄一金劔令投於伊水中以厭人滕之怪弘景按水經云伊水有一物如人滕頭有爪人俗輒沒不復出

安帝祐在位十九年以元初六年鑄一劔藏峨眉山疑山玉也

順帝保在位十九年以永建元年鑄一劔長三尺四

**Page not available.**

Please help scan and add.

页面不可用。

请协助扫描添加。



理一與魯王永一與諸葛亮一與關羽一與張飛一  
與趙雲並是亮書皆作風角處所有令稱元造刀五  
萬口皆連環及刃口列七十二鍊柄中通之兼有二  
字房子容曰唐人尚書郎李章武本名方古貞元季  
年爲東平帥李師古判官因理第掘得一劍上有章  
武字方古博物亞張茂先亦曰蜀相諸葛孔明所佩  
劍也乃改名師古爲奏請爲章武焉蓋蜀主八劍之  
一也

後主禪延熈二年造一大劔長一丈二尺鎮劔口山  
往往人見光輝後人求之不獲

吳王孫權以黃武五年採武昌銅鐵作千口劔萬口  
刀各長三尺九寸刀頭方皆是南銅越炭作之文曰  
大吳小篆書又赤烏年中有人得淮陰侯韓信劔帝  
以賜周瑜

孫亮以建興二年鑄一劔文曰流光小篆書

孫皓以建衡元年鑄一劔文曰皇帝吳王小篆書

晉武帝司馬炎以咸寧元年造八千口刀銘曰司馬

懷帝熾以求嘉元年造一劍長五尺銘曰步光小篆書

成帝衍以咸和元年造十三口刀銘曰興國

穆帝聃以求和五年於房山造五口劍銘曰五方單符隸書

孝武帝昌明以大元元年於華山頂埋一劍銘曰神劍隸書

宋武帝劉裕以求初元年鑄一刀銘其背曰定國小篆書長四尺後入於梁

少帝義符以景平元年造一刀銘曰五色小篆書

後廢帝昱以元徽二年於蔣山頂造一劔銘曰永昌  
篆書

順帝準以昇明元年掘得一刀銘曰上血其刀照一  
室帝竒之至二年七月帝使楊玉候織女玉候女不  
得懼死用以弑帝果如銘故知吉凶其徵先見矣

齊高帝蕭道成以建元二年造一刀銘曰定業長五  
尺篆書自制之

明帝鸞以建武二年造一刀銘曰朝儀長四尺小篆

書

梁武帝蕭衍以天監二年卽位至普通中歲在庚子命弘景造神劔十三口用金銀銅錫鐵五色合爲之長短各依劔術法文曰服之者永治四方並小篆書諸小國刀劔總在此

前趙劉淵以元熙二年造一刀長三尺九寸文曰滅賊隸書

後趙石勒以建平二年造一刀用五百金工用萬人頭尖長三尺六寸銘曰建平隸書勒未貴時耕地得

一刀銘曰石氏昌篆書

石季龍以建武十四年造一刀長五尺銘曰皇帝石氏隸書

後蜀李雄以晏平元年造刀五百口文曰騰馬隸書  
前涼張寔造刀百口無故刀盡失文曰霸

後魏昭成帝拓跋犍以建國元年於赤冶城鑄刺刀  
十口金鏤赤冶字

道武帝珪以登國元年於高阿鑄一劍銘曰鎮山隸書

明元帝嗣以泰常元年造一劍長四尺銘背曰太常  
至真君元年有道士繼天師白爲帝造劍長三尺六  
寸隸書因改元真君

宣武帝恪以景明元年於白鹿山造一刀文曰白鹿  
隸書

前秦苻堅以甘露四年造一刀用五千工銘曰神術  
隸書

前燕慕容雋以元璽元年造二十八口刀銘曰二十  
八將隸書

後燕慕容垂以建興元年造二刀長七尺一雄一雌  
隸書若別處之則鳴

後秦姚萇以建初元年造一刀銘曰中山長三尺七  
寸隸書

西秦乞伏國仁以建義三年造一刀銘曰建義隸書  
後涼呂光以麟嘉元年造一刀銘背曰麟嘉長三尺  
六寸

南涼禿髮烏孤以太初三年造一刀狹小長二尺五  
寸青色匠人曰當作之時夢見一人被朱服云吾是



太一神來看汝作云此刀有獻必鳴後落突厥可汗  
所有也

南燕慕容玄明以建平元年作刀四口文曰建平隸  
書

西京李嵩以求建元年造珠碧刀一口銘曰百勝隸  
書

北凉沮渠蒙遜以求安三年造刀百口銘曰永安隸  
書

夏州赫連勃勃以龍昇二年造五口刀背刃有龍雀

環兼金縷作一龍形長三尺九寸銘曰古之利器吳  
楚湛盧大夏龍雀名冠神都可以懷遠可以柔邇如  
風靡草威服九區宋王劉裕破長安得此刀後入於  
梁

吳將刀

周瑜作南郡太守造一刀背上有盪寇將軍字八分  
書

蔣欽拜列郡司馬造一刀文曰司馬隸書

周幼平擊曹公勝拜平虜將軍因造一刀銘背曰幼

平

董元成少果勇自打鐵作一刀後討黃祖於蒙衝河  
元成引刀斷衝頭爲二流拜大司馬號斷蒙刀

潘文拜偏將軍爲擒關羽拜固陵太守因造一刀銘  
曰固陵

未理君少受征討黃武中累功拜安國將軍作一佩  
刀文曰安國

關羽爲先主所重不惜身命自採都山鐵爲二刀銘  
曰萬人及羽敗羽惜刀投之水中

張飛初拜新亭侯自命匠鍊赤朱山鐵爲一刀銘曰  
新亭侯蜀大將也後被范強殺強將此刀入於吳  
諸葛亮定黔中從青石祠過遂抽刀刺山投刀不拔  
而去行人莫測

黃忠漢先主定南郡得一刀赤如血於漢中擊夏侯  
軍一日之中手刃百數

### 魏將刀

鍾會克蜀於成都土中得一刀文曰太一會歿入帳  
下王伯昇伯昇後渡江刀遂飛入水

鄧艾年十二曾讀陳太丘碑碑下掘得一刀黑如漆長三尺餘刀上常有氣淒淒然時人以爲神物

董卓少時耕野得一刀無文字四面隱起作山雲文斷玉如泥及卓貴示五官郎將蔡邕邕曰此項羽之刀也

袁紹在黎陽夢有一神受一寶刀及覺果在臥所銘曰思召紹解之曰思召紹字也

郭維於太原得一刀文曰宜爲將後遂爲將軍及與蜀將戰敗失此刀

王雙曾於市中買得一刀賣人曰得之者貴因不見  
雙後佩之爲魏將後與曹真一刀換也

古今刀劍錄

終